

## KINANŌ TAKADA KAAKU

Sulemanu kíblena 1:1-2:46

Kí Sulemanu yā 3:1-11:43

Yudanŏ kŏn Isarailinŏ kŏkpaatena 12:1-16:34

Ilia yā 17:1-22:54

### *Adonia a zīnda kana kí ũu*

<sup>1</sup> Gurŏŏ kè kí Dauda zi kũ kótokoto, baa tó wà bisanŏ kùàla, ĩa ègŏ kpεε à dεεμε.

<sup>2</sup> Ben à ìbanŏ bèνε: Wa dii kí, ò tó wà nŏkpare wεtenne, àgŏ zī keenne àgŏ n gwaa, àgŏ daεε n saε lε ĩa tón n dε dŏro.

<sup>3</sup> Ben wà gàa wà kpáε kè nŏkpare maaazi Isarailinŏ bùsun píngi, ben wà bŏ Sunεmu nŏgbē Abisagaa, wà à sè wà sùo kínane.

<sup>4</sup> Nŏkpare pì né nŏ maaame. Ègŏ kína gwaa àgŏ zī keεne, mŏde kí à dŏ nŏgbē ũro.

<sup>5</sup> Dauda naŏ Agi né Adonia a zīnda dìe kè a ka, ben à bè ámbε é kí ble. Ben à sŏgoronŏ sè kŏn sŏdeeno kŏn gŏgbē gŏŏn baplaa akuri kè aŏégŏ bàa lεε wàgŏ téarε aεnŏ.

<sup>6</sup> À dee e kpākēzi ziki à be, à kè dia née keε lεero. Àpi sŏ né gŏ maaame. Abusalomu bé à yŏ mì à kpàa.

<sup>7</sup> Ben à lεdole kè kŏn Zeruya né Yoabuo kŏn sa'ori Abiatao, ben aŏ zèo.

<sup>8</sup> Mŏde sa'ori Zadŏki kŏn Yoyada né Benayao kŏn annabi Natáŏ kŏn Simεio kŏn Dauda gbēnnanŏ kŏn à dogarinŏŏ e zεoro.

<sup>9</sup> Adonia saa ò kŏn sãanŏ kŏn zùnŏ kŏn zùne mēkpananŏ Mlègbε kè kú Enlogeli saεa. À a dāaro

kíneno sisi ní pínghi kǒn Yuda kè aǎo de kína ìba ũuno ní pínghi.

<sup>10</sup> Èe annabi Natã sísiro ke Benaya ke Dauda dogarinǒ ke a zĩnda dǎaro Sulemanu.

<sup>11</sup> Ben Natã gǎa à Sulemanu da Baseba là à bè: Néε ma kè Agi né Adonia kí blè wa dii kí Dauda dǎna sairoo?

<sup>12</sup> Tǒ, ò tó mà lé damma sa lán né ke nà, ò n zĩnda mì sí kǒn n né Sulemanu pǒo.

<sup>13</sup> Ò fεε ò gá kí Dauda le ò bene, kè à la dǎnne yǎ à bè n né Sulemanu bé eé kí ble a gεε ũ à vεε a kpatan sǒ né? À kè dia Adonia gǔ kí ũu?

<sup>14</sup> Gurǒ kè ní kpé néε yǎ oone, mé gε mà yǎ'i kaara se.

<sup>15</sup> Ben Baseba gǎa à kína là à kpén, guu kè Sunemu nǒgbε Abisaga e à gwaan. Kí sǒ zi kǔ.

<sup>16</sup> Baseba kùε à mì pèene, ben kí à là à bè: Bón ní yezi?

<sup>17</sup> À wèàla à bè: Ma dii, míbe ní sǐ mamǒma n zǒblerinε kǒn Dii n Luda tǒo, n bè ma né Sulemanu bé eé kí ble n gεε ũ à vεε n kpatan.

<sup>18</sup> Tia sǒ ma dii kí, Adonia bé à kè kí ũ, bensǒ ní à yǎ dǎro.

<sup>19</sup> À saa ò kǒn zùnǒ kǒn zùne mèkpananǒ kǒn sǎanǒ paripari, à n néno sisi ní pínghi kǒn sa'ori Abi-atao kǒn zǐkpε dǎn'aede Yoabuo, mǒde èe n zǒbleri Sulemanu sísiro.

<sup>20</sup> Ma dii kí, míbe Isarailinǒ pínghi sǒkpanzi, wà ma tó dé bé eé ke kí ũ n gbèn.

<sup>21</sup> Ma dii kí, tó n gaa n dezinǒ kúkiia, mapi kǒn ma né Sulemanuo, weégǒ wa gwaa taarideenǒ ũme.

22 Kè à kpé èe yã oo kǝn kínao, ben annabi Natã m̀.

23 Wà ò kíne kè annabi Natã kú kè. Ben Natã gè à kùe kínane à dàe a puua

24 à bè: Ma dii kí, míbe n bè Adonia ke kí ũ à v̄eε kpatan n ḡeε ṹ?

25 Zaake à g̀aa à saa ò gb̄aa kǝn z̀unɔ kǝn z̀une m̀ekpanano kǝn s̄aano paripari. À n n̄eno s̄isi n̄ píngi kǝn n z̀ikpe d̄on'aεdeeo kǝn sa'ori Abiatao. Āɔe p̄ó bleo, w̄e í mii tia, āɔe bee: Luda kí Adonia d̄s kǝn aafiao!

26 M̀de èe mamɔma n z̀òbleri sísiro ke sa'ori Zad̄oki ke Yoyada né Benaya ke n z̀òbleri Sulemanu.

27 Ma dii kí, ase le n kè leε, ben n gi gb̄e kè eé v̄eε kpatan n ḡeε ũu o wamɔwa n z̀òblerinɔnεzió?

### *Sulemanu kana kí ũ*

28 Ben kí Dauda bè: À Baseba sísiε. Kè Baseba m̀ à ḡe, à m̀ à zè kí aε.

29 Ben kína la dàne à bè: Kǝn Dii kuunao! Àm̀ kè à ma b̄o naw̄εa píngi guu.

30 Ladana kè má k̄enne kǝn Dii Isarailinɔ Luda t̄so, ma bè n né Sulemanu bé eé kí ble ma gb̄en à v̄eε kpatan ma ḡeε ũ, mé papa gb̄aa k̄ank̄amme.

31 Ben Baseba kùe à mì p̄eε t̄ɔt̄e kínane à bè: Ma dii kí Dauda, Luda n d̄s kǝn aafiao gurɔ píngi!

32 Ben kí Dauda bè: À sa'ori Zad̄oki sísiε kǝn annabi Natão kǝn Yoyada né Benayao. Kè āɔ m̀ kína kiia,

33 à bèn̄e: À ma íbaɔ kak̄ɔa é ma né Sulemanu sé à à di ma b̄aaḡas̄ɔa, é ḡáo Gīs̄.

34 Gwen sa'ori Zadoki kōn annabi Natāo é nōsi kúa aō à ká Isarailinō kí ũ, é kuru pé à wii lé à be: Luda kí Sulemanu dō kōn aafiao!

35 Beee gbɛra é suo, eé vɛɛ kpatan àgō kí blee ma gbèn. Àmbe má diɛ Isarailinō kōn Yudanō dōn'aɛdee ũ.

36 Ben Yoyada né Benaya bè kɛnanɛ: À kɛ lɛ! Dii n Luda n légbɛ sí ma dii kí!

37 Lán Dii kúnyo nà ma dii kí, àgō kú kōn Sulemanuo lɛ, à à kíkɛ sé lezī de n pōla se.

38 Ben sa'ori Zadoki kōn annabi Natāo kōn Yoyada né Benayao kōn dogarinō gàa wà Sulemanu dì kí Dauda bāagāsōa, aō gàa zɛnɛ Giō.

39 Ben sa'ori Zadoki nōsi tūu sè Dii kpén, à nōsi pì kù Sulemanua. Ben wà kuu pè, baade píngi wii lè wà bè: Luda kí Sulemanu dō kōn aafiao!

40 Ben baade píngi bō wà tēzi, aōɔɔe suu aōɔɔe gaasia pɛɛ, aōɔɔe pōnnaa kɛɛ maamaa ai tōɔɔe nìgā kīi kè aōɔɔe kɛɛ pì yānzi.

41 Kè Adonia kōn gbɛ kè à ní sisinō pó blè wà yāa, aōɔɔe mōɔ fɛɛ, ben aō kīi pì mà. Kè Yoabu kuru'ò pì mà, ben à bè: Bó zōka bé à dō wéte guu lɛɛ?

42 Èe yā pì o à yāaro, ben sa'ori Abiata né Yonatā gàa káo gōɔ. Ben Adonia bè: Ñ gɛ. Gbɛ bèɛdeen n ũ, mɛɛ sii baaru nnaan n suo.

43 Ben Yonatā bè Adonianɛ: Lenlo! Wa dii kí Dauda Sulemanu kpà kpatan.

44 À sa'ori Zadoki kōn annabi Natāo kōn Yoyada né Benayao kōn a dogarinō gbàɛ aō gáo, ben aō gàa wà à dì kína bāagāsōa.

45 Ben sa'ori Zadoki kōn annabi Natāo nōsi kúa aō à kà kí ũ zaa Giō. Kè aō bō gwe, aō sù kōn pōnnakɛnao, ben wéte lògo. Kīi kè á màn gwe.

46 Baa diame Sulemanu v̄εε kpatan kò.

47 Ben wa dii kí Dauda ìbanò mò wà ì kpàa se, aõ bè Luda Sulemanu tó bɔ de à pòla! Luda à kíkεε gba gbãaa de à pòla! Ben Dauda mì nàε à ðonzi kè Diine a daεbɔa

48 à bè: Wà Dii Isarailinò Luda sáabu kpá, kè à tò ma wéε sì ma ḡεε kana kí ùle gbàa.

49 Kè gbē kè Adonia n̄ sisinɔɔ mà le, ben aõ làakari f̄εε, baade a zé kù.

50 Kè Adonia e v̄ia kεε Sulemanunε yānzi, ben à f̄εε à gàa à nà Dii gbāgbākiizi, à a koba kù.

51 Ben wà bè Sulemanunε: Adonia e v̄ia kεennε, à gàa à nà Dii gbāgbākiizi à a koba kūna, èe bee ñ la da amɔa n zòblerinε gbàa, kè né a ðero.

52 Ben Sulemanu bè: Tó à a zīnda kūna dō gbē maa ũ, baa à mìkã wén do eé léε tɔɔtero. Tó wà gà wà à zaa ke èa s̄, à gàmε.

53 Ben kí Sulemanu gbēnɔ z̄i, aõ Adonia gò Dii gbāgbākiia. Kè Adonia pì mò à kùenε, ben Sulemanu bènε: Ñ tá n be.

## 2

### *Dauda lédiεna Sulemanunε*

1 Kè Dauda gagurɔɔ kà k̄i, à lé ðiε a né Sulemanunε à bè:

2 Méeε gaa anduna gbē píngi gákii. Ñ zε gbãa, né n zīnda ɔɔa kè négōgbēn n ũ!

3 Ñgaegō Dii n Luda yānɔ kūna, négō té à zézi, négō à ɔɔkii gwaa, négō à yādiεnanɔ kūna k̄n à dokayānɔ k̄n à yā'onnenanɔ, lán à kú Musa doka takadan nà, yā kè néε kεε píngi égō bɔɔ maa, n tá píngi égō nna.

<sup>4</sup> Len Dii é yā kè à òmεε papa le à bè, tó ma néno ní zĩnda kũna dō bensō aō tē ma zézi kōn nòseo do kōn poyezinao píngi, ma boriino égō v̄ēena Isarailino kpatan gurō píngi.

<sup>5</sup> Ní yā kè Zeruya né Yoabu kèmεε dō, lán à Isaraili zìkpe dōn'aede gōon plaaano dède nà, Nεε né Abana kōn Yeta né Amasao. À gbē pino dède, èe ke sō zì gurōnlo. Aō aru gō à musu, à kù à asaaa kōn à kyateeno.

<sup>6</sup> Ní yā kenε n òndōna lén. Nton tó à mikā pura kũ gbasa à dae miran yīi guuro.

<sup>7</sup> Ní gbēkεε ke Giliada gbē Bazilai négōgbēnoε. Ní ní die gbē kè égō pó blee ledoono tē, zaake aōmbe aō zèmao gurō kè mée bàa sii n v̄i Abusalomunε.

<sup>8</sup> Beyāmi bori Gera né Simεi, Bahurimu gbē kũnyo dō. À ma ka pāsīpāsī gurō kè mée gaa Manaimu. Kè à mò à ma le Yodazi, má sìne kōn Diio kè mé à dero.

<sup>9</sup> Baa kōn beeeo nton à tó pā wétāmma sairo. Ní òndō, ní dō dian né kenε nà à ga zégbān à gē miran.

<sup>10</sup> Ben Dauda gà. Yerusalemu fáandi kè wà à v̄in wè be Dauda wéte.

<sup>11</sup> À kè Isarailino kí ũ ai wè baplaa, Eblōnu wè swεεplaa, Yerusalemu wè baaakuri awεε'aagō.

<sup>12</sup> Sulemanu v̄ēε a de gbèn bensō à kpata kāsāa pεena.

### *Adonia gana*

<sup>13</sup> Agi né Adonia gà à Sulemanu da Basεba lè, ben Basεba à là à bè: Aafian n mōó? À wèàla à bè: Aafiamε!

14 Adonia èara à bè: Má yā vī mà onne. Baseba bè: Ì o!

15 Ben Adonia bè: Ì dō kè kpata né ma pómé yā. Isarailino wée kúma ñ píngi mà ke ñ kí ũ, ben yā liè, ma dāaro bé à kpata blè, zaake Dii bé à à kà.

16 Tia sa yā mèn doon mée wée kemma, ñton gí kemeziro. Baseba bè: Ì o!

17 Ben à bè: Ì wée kemé kí Sulemanua à Sunemu nɔgbɛ Abisaga kpáma nɔɔ ũ, zaake eé gíonnero.

18 Baseba bène: Tò, mé onenne.

19 Kè Baseba gàa à kí Sulemanu lè Adonia yā pì musu, ben kína pì fèe à gàa à dààle à kùene, ben à èara à mò à vèe a kiblekitan. Ben wà mò Basebanɛ kɔn kiblekita pāndeo, ben à vèe kí ɔplaazi.

20 Baseba bè: Póken má yezi mà wée kemma, ñton ma tēro. Ben kí bè: Ì wée ke Naa, mé n tēro.

21 Ben Baseba bè: Ì tó wà Sunemu nɔgbɛ Abisaga kpá n vī Adoniaa à à sé nɔɔ ũ.

22 Ben kí Sulemanu a da là à bè: Bóyānzin nées Sunemu nɔgbɛ Abisaga wée ke Adonianɛzi? Ì kpata wée ke nɛ gɔmɛee! Zaake ma vīime. Nées kpata wée ke nɛ kɔn sa'ori Abiatao kɔn Zeruya né Yoabuome.

23 Ben kí Sulemanu sì kɔn Diio à bè: Tó Adonia e kora a wèndizi yā kè à wée kè kè yānziro, Luda yā kemé pāsīpāsī.

24 Zaake Dii ma ka kpatan, à ma diɛ ma de Dauda gēe ũ, à ma borii gbà gbāaa lán à à lé gbè nà, má sì kɔn Diio Adonia é ga gbāame.

25 Ben kí Sulemanu Yoyada né Benaya dà, à gàa à Adonia lè à dè.

### *Sulemanu pena Abiataa kōn Yoabu ganao*

<sup>26</sup> Kína bè sa'ori Abiatanε: N̄ εara n̄ tá n guun Anato. À kō sio n̄ game, m̄ode mé n de tiaro, zaake m̄be n Dii Luda àkpati sè n d̄o ma de Daudanε aε, bensō n zeo à nawēa píngi guu.

<sup>27</sup> Len Sulemanu pè Abiataa ε, à à bò Dii gbāgbāna zīin, ε yā kè Dii ò Eli bedeen̄o musu zaa Silo e à papa yānzi.

<sup>28</sup> Kè Yoabu yā pì baaru mà, ben à bàa s̄i à gàa Dii bisakuta kiia, à nà Dii gbāgbākiizi à à koba kù. Yoabu zè kōn Adoniaomε yā, m̄ode èe ze kōn Abusalomuoro.

<sup>29</sup> Wà ò kí Sulemanunε kè Yoabu bàa lè à gàa Dii bisakuta kiia, à kú sa'okii p̄i saε, ben Sulemanu bè Yoyada né Benayanε à gá à yāao gwe.

<sup>30</sup> Kè Benaya kà Dii bisakuta kiia, à bènε: Kína bè n̄ b̄o gwe! Ben Yoabu bè: Auo! Gura kèn mé gan. Ben Benaya gbēn̄o z̄i kinaa à bè: Lán Yoabu wēmala n̄an yè.

<sup>31</sup> Ben kína bènε: N̄ kenε lán à ò nà. N̄ à de, né à v̄i, ε à gbēdena p̄a yā tón wí mapi kōn ma de bedeen̄o musuro.

<sup>32</sup> Dii é tó à gbēdena yā wí à musu, zaake à l̄ε taarisaiide ḡōn plaaa kè āo maaa dealaan̄o. À Nεε né Abana, Isaraili z̄ikpε d̄on'aede kōn Yeta né Amasa, Yuda z̄ikpε d̄on'aedeeo d̄ède ma de lé saε.

<sup>33</sup> Āo dena yā égō wii Yoabu kōn a boriin̄o musu gur̄o píngi, m̄ode Dii égō Dauda kōn a boriin̄o kōn a uao kōn a kpatao gbaa aafia gur̄o s̄anda píngia.

<sup>34</sup> Ben Yoyada né Benaya gàa à Yoabu lè à dè, ben wà à v̄i a be zaa gbáan.



<sup>35</sup> Ben kína Yoyada né Benaya diè zìkpe don'aedee ũ Yoabu gbèn, sa'ori Zadoki sɔ̄, Abiata gbèn.

### *Simèi gana*

<sup>36</sup> Kína gbēno zì aɔ̄ Simèi sìsi, ben à bène: N̄ bæ bo Yerusalemu kè ngɔ̄ kún. N̄ton bo bæa kè n̄ gá gukearo.

<sup>37</sup> Ngɔ̄ dɔ̄ sãnsã n̄ zì kè n̄ bikù Kidironua, n̄ gan gwe. M̄de r̄be n̄ n̄ z̄inda dè.

<sup>38</sup> Ben Simèi bè kine: Yã maaan n̄ ò ma dii kí. Mamoma n̄ z̄bleri mé ke lán n̄ ò nà. Ben à kú Yerusalemu le ai à gí kè.

<sup>39</sup> Wè aagɔ̄ gbera Simèi zò gɔ̄on plaaano bàa sì wà tà Maaka né Akisi, Gata kína kiia, ben wà bè Simèine: N̄ z̄onno kú Gata.

<sup>40</sup> Ben Simèi fèe à gàari yì a zaakine, à gàa Akisi kiia Gata a zò pino wete. Kè à n̄ é, ben à n̄ sée Gata à sùnyo.

<sup>41</sup> Ben wà ò Sulemanune, Simèi bò Yerusalemu à gàa Gata à èara à sù.

<sup>42</sup> Ben kína gbēno zì aɔ̄ Simèi sìsiare, ben à bène: Má tò n̄ sì kɔ̄n Diio, ben ma lé dàmma ma bè, zì kè n̄ bo kè n̄ gaa gukea, ngɔ̄ dɔ̄ kè n̄ game. Ben n̄ bème, yã maaame, n̄ mà.

<sup>43</sup> Bóyánzin n̄ bo ladana kè n̄ kè kɔ̄n Dii tó kpezi kɔ̄n yã kè má d̄anneo?

<sup>44</sup> Ben kína èara à bène do: Yã zaaa kè n̄ kè ma de Daudane dongu pingi. Dii bé eé tó à zaaa pì wí n̄ musu sa,

<sup>45</sup> m̄de eé aubarika damagu à tó Dauda kpata kāsãa gɔ̄ p̄ena ai guro s̄anda pingia.

<sup>46</sup> Kína Yoyada né Benaya dà, ben à gàa à Simèi lè à dè. Len Sulemanu kpata kāsãa p̄e le.

## 3

*Sulemanu ɔ̃ndɔ wéekena*

<sup>1</sup> Sulemanu lɛdole kè kɔ̃n Iyipiti kí Fili'aunao, à à nɛ̃nɔ̃gbɛ̃ sè nɔ̃ ɔ̃ à sùo Dauda wétɛn àton a bɛ kɔ̃n Dii uao kɔ̃n Yerusalemu b̃iio bo à mì dɛ.

<sup>2</sup> Gurɔ beeeaa wèe kpé bo Diine kòro, ben wègɔ saa oo kp̃iii musu tãagbãgbãk̃iina.

<sup>3</sup> Sulemanu ye Diizi, à a de Dauda yãdiɛnanɔ k̃una, mɔde è saa o gbãgbãk̃ii p̃ina, ben ègɔ tu-aetiti kpata gwe.

<sup>4</sup> Ben à gàa saa o zaa Gibiɔ, zaake gbãgbãk̃ii p̃i bé à dɛ à kpaaanɔla. À sa'opɔ kè wè ká tén à té k̃ú ò gwe mèn wãa sɔ̃ro.

<sup>5</sup> Gwen Dii bò à m̀zi nanaa guu gwãaṽi à bè: Ñ p̃ó kè ñ yezi wéee kema.

<sup>6</sup> Ben Sulemanu bè: N gbèkɛɛ kè n zòbleri ma de Daudanɛ maamaa, kè à dennɛ gbè maa náanɛde nòsɛpuradee ɔ̃ yãzi. N gbèkɛ b̃ita kènɛ, ñ tò mamɔma à né e kí blee à g̃ɛ ɔ̃ gbãa kèa.

<sup>7</sup> Tia sa Dii ma Luda, n mamɔma n zòbleri kà kí ɔ̃ ma de Dauda gbèn. Né féten ma ɔ̃, má yãke gbá d̃ro.

<sup>8</sup> Mamɔma n zòbleri, má kú n gbè kè ñ sènɔ té. Aɔ̃ pari, wéee f̃ò wà ñ naro wà ñ lé d̃ro.

<sup>9</sup> Ñ mamɔma n zòbleri gba ɔ̃ndɔ, lɛ màgae yã g̃ɔg̃ɔ n gbɛ̃nɔnɛ a zéa, màg̃ɔ à maaa d̃k̃ɔzi kɔ̃n à zaaao. Tó lenlo, dian mé kɛ nà mà yã g̃ɔg̃ɔ n gbè pari daa p̃inɔnɛ?

<sup>10</sup> Yã kè Sulemanu wéee kè p̃i kè Diine,

<sup>11</sup> ben à bènɛ: Zaake yã kè ñ wéee kèn gwe, néee wèndi gbãa wéee kero ke auziki ke n ibɛɛnɔ gaa, séde yãg̃ɔg̃ɔna a zéa d̃nan ñ wéee kè,

<sup>12</sup> mé ke lán n̄ wée kè nà, mé n gba òndõ k̄n wéez̄ẽo. Gbẽ kee kuu n ã ke n gbera kè eégõ òndõ lán n bàro.

<sup>13</sup> Mé pò kè n̄ee wée kero kpámma d̄o. Mé n gba auziki k̄n gakuio píngi ai n wèndi lén. Kína ke é ká n ūro.

<sup>14</sup> Tó n̄ t̄emazi, bensõ n̄ ma yã'onnenan̄o k̄n ma yãdienan̄o k̄na lán n de Dauda k̄na nà, mé n wèndi d̄onne k̄n m̄okyakooo.

<sup>15</sup> Ben Sulemanu vù, à è kè nanaan á ò. Ben à tà Yerusalemu, à gàa à zè Dii bà kuuna k̄n Isarailin̄o àkpati ae, à sa'op̄o kè wè ká tén à té k̄n̄o k̄n kennak̄o sa'op̄o ò gwe, ben à p̄onna p̄oblee kè a ìban̄ne.

### *Sulemanu yãḡõḡõna kaaruan̄ne*

<sup>16</sup> Z̄īkea kaarua ḡõn plaa ken̄o m̄ò Sulemanu kiia, aõ zè à ae.

<sup>17</sup> Aõ gbẽ doo bè: N̄ gaafaa kem̄e kí. Mapi k̄n n̄ogbẽ kèò wá kú kpé d̄nk̄omm̄e. Ben ma né ì wámbe wa plaa kpé pì guu.

<sup>18</sup> À gur̄o aaḡõdee z̄i n̄ogbẽ pì né ì se. Wámbe wa plaa kpé pì guu, gbẽkee kúwao gwero.

<sup>19</sup> Kè n̄ogbẽ pì d̄ae a n̄éḡõgbẽ p̄ia gwáav̄i, ben à gà.

<sup>20</sup> Ben à f̄ee gwáav̄i lez̄ando, à ma n̄éḡõgbẽ sè ma sae gur̄o kè mam̄oma n z̄òbleri e ii oo, à d̄ae a sae, ben à a né gè kii sè à d̄aem̄e ma sae.

<sup>21</sup> Kè ma vu k̄nḡo mà yõ kpá ma néa, ben má è gè. Kè má gwà tíii, ben má è ma n̄énlo.

<sup>22</sup> Ben n̄ogbẽ pì gb̄endoo bè: Egeem̄e! Ma né bé à b̄ee, n pò bé à gà. Ben n̄ogbẽ káaku bè: Egeem̄e! N né bé à gà, ma pò bé à b̄ee. Ben aȭe leokpak̄õa kee kína aezi.

<sup>23</sup> Ben kína bè: Gbē kèkii e bee a né bé à bēε, n pò bé à gà, bensō gbē kèkãa e bee, εγεεμε, n né bé à gà, a pò bé à bēε.

<sup>24</sup> Ben kína bè: À mómε kōn fēεdaao. Ben wà m̀onε.

<sup>25</sup> Ben kína bè: À né kè bēε zōkōre plaa, à à kpadoo kpá gbē dooa, é à kpadoo kpá dooa.

<sup>26</sup> Nɔgbē kè a né bēε sō, né pì kènε wēnda, ben à bè kínane: Kí, ò né kè bēε pì kpáa, ònton à dero. Ben à gbēndoo bè: Wà à zōkōre plaa, wa píngi wà korazi.

<sup>27</sup> Ben kína yā mì dè à bè: À né kè bēε pì kpá nɔgbē káakua. Àton à dero. À dan gwe.

<sup>28</sup> Kè Isarailinɔ yákpae kè kína kè pì mà, aō vĩa kènε, zaake aō è Luda à gbà ɔndō à yā gōgō a zéa.

## 4

### *Sulemanu ibanɔ*

<sup>1</sup> Kí Sulemanun Isaraili bori píngi kína ũ.

<sup>2</sup> À bùsu dɔn'aεdeenɔ tón yè: Zadɔki né Azarian sa'oriki ũ.

<sup>3</sup> Sisa néno Eliɔrefi kōn Ahiaon à takadakērinɔ ũ. Ailudi né Yosafatan yāzibaarukēri ũ.

<sup>4</sup> Yoyada né Benayan à zìkpe dɔn'aεdee ũ. Zadɔki kōn Abiataon sa'orinɔ ũ.

<sup>5</sup> Natā né Azarian à gu dɔn'aεdeenɔ gbēnsi ũ. Sa'ori Zabudu, Natā nén à kpàasi ũ.

<sup>6</sup> Aisan à begwari ũ. Abada né Adoniramun zòzì gbēnsi ũ.

<sup>7</sup> Kí Sulemanu Isarailinɔ bùsu gbēnsinɔ dìediε guunɔa gōon kuri awεεplaa. Wè kōn wèo aō baade è mó kína kōn a uadeenɔne kōn pòbleo aō baade kōn a m̀oo.

8 Aã tón yè: Benuru bé à Eflaimu boriino gu sîsîdee vî.

9 Benideka bé à Makaza kôn Salabimuo kôn Besemesio kôn Elni Betanao vî.

10 Benesedi bé à Arubo kôn Sokoo vî kôn Efa guuo píngi do.

11 Benabinadabu bé à Doru gusîsîdee vî. Sulemanu nénogbê Tafame à nɔɔ ũ.

12 Ailudi né Baana bé à Tanaki vî kôn Megidoo kôn Betesã guu kè kîi kôn Zaretão Yezèrili gîzî kpa píngi zaa Betesã ai Abeli Mɛɔla ai Yókemɛamu kãa kpa.

13 Benigeba bé à Ramo Giliada vî kôn Manase né Yairi lakutu kè kú Giliada guunno kôn Agobu guu kè kú Basão kôn à mɛɛwi bîide mèn baaagɔɔno. Wà í zé gbãngano kè kôn m̀gotẽomɛ.

14 Ido né Ainadabu bé à Manaimu guu vî.

15 Aimaza bé à Nafatali guu vî. Àmbe à Sulemanu nénogbê Basema sè nɔɔ ũ.

16 Usai né Baana bé à Asa guu vî kôn Alotio.

17 Parua né Yosafata bé à Isaka guu vî.

18 Ela né Simèi bé à Bèyãmi guu vî.

19 Uri né Geba bé à Giliada guu vî. Amorino kí Siõ kôn Basã kí Oguo bé wà kú gwe yã. Geban guu pì dɔn'aɛdee ũ ado.

20 Yudano kôn Isarailino pari lán ísiale bùsu'aatẽ bà. Aãgẽ pó blee wàgõ í mii wà ponnaa kɛ.

### *Sulemanu nnamana kôn à ɔndɔɔ*

21 Zaa Yuflati ai Filisitininɔ bùsun kôn Iyipiti bùsu léo, Sulemanu bé à kí blè bùsu pìnoa píngi. Bùsu pìno gbẽno ègõ tángba kpaai ai à wèndi lén.

22 Sulemanu ua gurɔ do blee yè: Flawa sàki baplaa akuri, wísiti sàki basɔro.

23 Zù m̀kpana k̀è wà gwà be m̀èn kuri, kpàsa zù m̀èn baro, sã m̀èn basɔro k̀òn gãano k̀òn z̀ono k̀òn dùano k̀òn ko maaano do.

24 Zaake à kí blè b̀usu k̀è kú Yuflati ɔfãntẽgẽkpen kpaano píngi sena zaa Tifisa ai Gaza, bensõ yãkete kú gukearo.

25 Sulemanu gurɔɔa Yudano k̀òn Isaraili k̀è aõ kú zaa Dani ai Besɛbano kaena n̄ b̀usun n̄ làakaria, baade k̀òn a geepi líno k̀òn a kákãpura líno.

26 Sulemanu s̄ k̀è aõè goro gáeno kése boro siigõ. À s̄ k̀è wè dimmanõ s̄, boro kuri awɛɛplaa.

27 Gu gb̄ensi p̄ino s̄, aõ baade ègõ m̄one k̀òn bleo a m̄on kí Sulemanu k̀òn gb̄è k̀è aõè mó pó bleono pó ũ. Póke è k̄esãrmaro.

28 Aõègõ m̄o s̄ p̄ino k̀òn éseo k̀òn s̄eo do guu k̀è aõ kún, lán wà diè n̄ baadene nà.

29 Luda Sulemanu gbà òndõ k̀òn wéɛz̄eo maa-maa. Weé f̄ wà à d̄na lé d̄ro, lán weé f̄ wà ísiale b̀usu'ãat̄é lé d̄ro nà.

30 Sulemanu òndõ de ɔfãntẽb̄ekpadeeno k̀òn Igitino póla n̄ píngi.

31 À òndõ de gb̄è píngila. À de Ezera bori Etani póla k̀òn Maoli néno Emani k̀òn Kalakolio k̀òn Daadao. À tó b̀ò b̀usu k̀è ligazino guu píngi.

32 À yáasi zù boro aagõ bensõ lè k̀è à dano kà boro do k̀òn m̀èn soro.

33 À líno k̀òn lano yã bok̄t̄ena k̀è, naana zaa sida lí k̀è kú Lebanõ b̀usun ai à gaa pé s̄s̄vl̄aa k̀è è b̄e b̄iano. À n̄b̄ono yã d̄anne do k̀òn b̄ano k̀òn pótaa'onkuseano k̀òn kp̄ono.

34 Kína k̀è aõ kú anduna guuno à òndõ baaru mà n̄ píngi. B̀usu k̀òn b̀usuo píngi n̄ gb̄eno z̄i wà gá à

ōndōyā ma.

## 5

### *Dii ua kaena soru*

<sup>1</sup> Kè Taya kí Hiramu mà kè wà Sulemanu kà kí ũ a de gēε ũ, à a ìba kenŋ zīa, zaake Dauda gbēnname yā.

<sup>2</sup> Ben Sulemanu lékpāsā kè Hiramunε à bè:

<sup>3</sup> N̄ dō kè ma de Dauda e e à kpé bò Dii a Ludanero, kè borii kè aō ligazinŋ e zī kaaŋ yānzi, ai Dii gàa à n̄ kéné tinti ũ.

<sup>4</sup> Tia sa Dii ma Ludaa tò ma ãmpakii è. Ibεε kee kú gukearo, mōnzi kee kuuro.

<sup>5</sup> Beee yānzin má yezi mà kpé bo Dii ma Ludanēzi, lán Dii ò ma de Daudanε nà, à bè à né kè é kpá kpatan à gēε ũu bé eé kpé boare.

<sup>6</sup> N̄ gbēnŋ da aō Lebanŋ sida línŋ zōzōmε. Ma zīkerinŋ é zīi pì ke kōn n zīkerinŋ ledŋ, mé n zīkeri pìnŋ fīa bonne lán n̄ ò nà píngi. N̄ dō kè wá gbēke vī à lízōna dō lán a Sidōdeenŋ bàro.

<sup>7</sup> Kè Hiramu Sulemanu yā pì mà, à pŋŋ kè nna maamaa à bè: Wà Dii tó kpá gbāa, zaake à Dauda gbà né ōndōdee, èe dŋŋ a gbē pariinŋne aε.

<sup>8</sup> Ben Hiramu gbēnŋ zī Sulemanua à bè: Ma lékpāsā kè n̄ kēmεε mà. Mé ke lán n̄ yezi nà sida línŋ kōn pini línŋ yā musu.

<sup>9</sup> Ma zīkerinŋ é lí pìnŋ sé zaa Lebanŋ kpiiinŋ musu, aōé pitao ísialea, mé yiyi mà gbēnŋ zīonne ísiaala. Guu kè n̄ òmen, gwen mé tó wà káennne, gbasa n̄ táo. Mpi sō, yā kè má yezi n̄ kemεen yē: N̄ póblee kpá ma uadeenŋa.

10 Len Hiramū ègō sida línō kōn pini línō kpaa Sulemanua le lán à yezi nà.

11 Sulemanu sō ègō pówεε kpaaa wè kōn wèo tōn wàa plaa kōn nōsio lita bōrō wàa plaa.

12 Dii Sulemanu gbà ɔndō lán à à lé gbène nà. Hiramū kōn Sulemanuo nna kōo, ben aō ledole vī.

13 Kí Sulemanu gbēnō sèse Isaraili boriinō té píngi à n dá zīi pì guu gōon bōrō baaakuri.

14 Ègō n zī Lebanō bùsun mō kōn mōo gōon bōrō kuri. Gbē pìnō è ke Lebanō mō do, ben aō su wà ke be mō plaplaa. Adoniramun zòzīi pì gbēnsi ū.

15 Sulemanu gbè'arinō vī gukpiideen gōon bōrō basiigō, à sèserinō sō gōon bōrō baaagō akuri.

16 Gbē pìnō baasi, Sulemanu gbēnō diēdie gōon bōrō aagō kōn wàa aagō, aōgō wéε tεε zīi pìzi.

17 Kína yā diē, ben wà gbè gbèntē maaanō yōyō wà à, wà sèε wà sùo kpé pì ēdaebōnō ū.

18 Len Sulemanu zīkerinō kōn Hiramū zīkerinō kōn Gebalideenō lí zōzō le aō kèkε, aō gbè kèkε kpé pì bobō ū.

## 6

### *Dii ua kaena*

1 Isarailinō bōna Igipiti wè wàa plaa kpé basiigōo gbèra, Sulemanu kíblena wè siigōdeen, à mō plaadee kè wè be Zivi guu, ben à nà Dii ua kaenaa.

2 Kpé kè à bō Diine pì gbàa kà gāsāsuu baaagō, à yàasa baro, à lezī baaakuri.

3 Kpé pì gbàadaaa vī a ae, à gbàa sēnkpεo gāsāsuu baro, à yàasa sō gāsāsuu kuri.



4 À windono bòbo, à lénno de yàasa, à guu kpaà de kpaatogo.

5 À kpéneno bòbo à liga kpé pìzi kòn a Ludakukiio kpa plaplaa kòn a kpεεo.

6 À didikōana aagōgō, kpéne kè kú tōtēno yàasa kà gāsāsuu sōsōoro, kè kú guranō swēedodo, kè kú musunō swēēplaplaa. Dii kpé gbè kè kú musunō yàasa kēsā tōtē pōzi, le wà e wà kpéne pì zànō didia kpé pì gbēfōna sai.

7 Kè wèe kpé pì boo, wà bō kòn gbè kè wà à zaa a yōkiiāome. Wèe eree ke gā ke zīkebō ke kīi ma kpé pì bokiiaro.

8 Kpéne kè kú tōtēno pīngi gēkii kú à sōomete kpame. Didikii gāa kpéne kè kú guranō kòn kpéne kè di à musunō kiia.

9 Kè à kpé pì bō à yāa, à dō kòn zà lino kòn sida lí lētegeeno.

10 À kpéne pino bō kpé pì gbāa lémmē. À pīngi lezī gāsāsuu sōsōorome, bensō wà n pēpe kpé pì kòn sida lío.

11 Ben Dii yā ò Sulemanunē à bè:

12 Kpé kè nēe boo kēki yā musu, tó nēe ma oðkii gwaa, tó n ma yādannenano kè, tó n yā kè má diēnneno kūna nēe zīi keea, mé lé kè má gbè n de Daudanē papanne.

13 Mégō kú ma gbē Isarailino té, mé n tónlo.

14 Kè Sulemanu kpé pì bō à yāa,

15 à sida lí lētegeeno nāna à gūa à guu sélele zaa tōtē ai à sātazi, ben à pini lí lētegeeno kpāe à tōtē pīngi.

16 À kpéne kè kpé pì guu Ludakukii ũ, à gbàa kà gàsásuu baro, ben à sida lí lèetegeeno nàna à gùa sélele zaa tóte ai à sàtazi.

17 Kpé pì gānu gbàa kà gàsásuu baplaa.

18 Sida lí kè wà nàna kpé pì guu, wà ɔzĩ kèa lán tũu kōn lāvũ pianaò bà. À píngi né sida líme, wè gbè ke e gupuraaro.

19 À kpé pì kpéne kèke Dii bà kuuna kōn Isarailino àkpati diékii ũ.

20 Kpéne pì gbàa kà gàsásuu baro, à yàasa do baro, à lezĩ sō baro. À vura atēe nàna kpéne pì gùa píngi. À tuaetitikpatakii kè wà kè kōn sida lío nàna kōn vuraò do.

21 À vura atēe nàna gānu gùa do, ben à mōkyakoo kè wà pì kōn vuraonò lògologo kpéne gù kè à vura nànaa pì kpéle kpa.

22 À vura nàna kpé pì guuguu sélele kōn tuaetitikpatakii kè kú kpéne pì saeo.

23 À kù lí à kerubunò ũ mèn plaa, à diè kpéne guu. Kerubu pìno lezĩ kà gàsásuu kuri.

24 Aō dèbenò gbàa kà gàsásuu sɔsɔro. Zaa dèbe do léa kè ai à do léa kãa à gbàa gàsásuu kuri.

25 Kerubu mèn plaaa pìnoò bòkòba, aō sēnkpepe.

26 Aō plaa ní píngi lezĩ kà gàsásuu kurikuri.

27 Ben à ní káe kpé pì kpéne guu. Aō dèbenò poroporona, à doo dèbe gaa à pè gùa kãa, à doo pò pè gùa kè, ben aō dèbe kè gōnò pè kōa kpéne pì guragura.

28 À vura nàna kerubu pìnoa do.

29 À ɔzĩ kè kpé pì gùnɔa gānu kōn kpéneo píngi,

à kerubunŋ wēzā kè kōn damina líŋ kōn lávu pi-  
ananŋ.

<sup>30</sup> À vura kpàe kpé pì tɔɔte dɔ, gānu kōn kpéneo  
píngi.

<sup>31</sup> À kpéne pì gbàŋ kōn à lípeneŋ kè kōn kù lío. À  
musu kè sōnte.

<sup>32</sup> À ɔzīi kè kù lí gbà mèn plaaa pìŋɔ, à kerubunŋ  
wēzā kè kōn damina líŋ kōn lávu piananŋ, ben à  
vura nānaa.

<sup>33</sup> À gānu gbà lí kè kusua siigŋ kōn kù lío dɔ.

<sup>34</sup> À à gbàŋ kè kōn pini lío ɔla plaa. Gbà pìŋ ɔla  
píngi è nakŋa guragura.

<sup>35</sup> Ben à ɔzīi kè gbà pìŋɔ, à kerubunŋ wēzā kè kōn  
damina lío kōn lávu pianao, ben à vura nānaa.

<sup>36</sup> À bīi bò à liga à uazi. Bīi pì gbè kè wà àŋ vī  
didikŋana leo aagŋgŋ, ben sida lí kè wà zōŋ kpákpa  
à musu.

<sup>37</sup> Wà Dii kpé pì εε kpàe Sulemanu kíblena wè  
siigŋden, à mɔɔ kè wè be Zivi guume,

<sup>38</sup> ben wà à laata kpà à wè kuri awεεdodeen, à  
mɔ sɔraagŋdee kè wè be Bulu guu lán à kpé zīi diε  
nà. À bona kōn à kekεnao kà wè swεεplaa.

## 7

### *Sulemanu be bona*

<sup>1</sup> Sulemanu a be bona zīi kè píngi wè kuri  
awεε'aagŋme.

<sup>2</sup> À kpé kè wè be Lebanŋ líkpe bò, à gbàa kà  
gàsāsuu basɔɔro, à yàasa kà gàsāsuu baplaa akuri,  
à lezī sŋ baaakuri. À sida líŋ pèpεε dŋrɔ siigŋ, ben  
à sida lí kè wà àŋ kpàkpaŋla

<sup>3</sup> mèn baplaa asɔɔro, dɔɔrɔ kɔn dɔɔrɔ gɛrogɛro lɛo aagɔ, ben à sida líno kpàkpa lí kè wà kpà pìnɔla.

<sup>4</sup> À à windonɔ bɔbɔ dɔɔrɔ aagɔgɔ didikɔana aɛo dɔdɔkɔa.

<sup>5</sup> Kpé pì lénɔ lezì kɔn à yàasao píngi sɛnkpekpeɛɛ. À lénɔ mèn aagɔgɔ káa kpa kɔn kè kpaaɔ aɛo dɔdɔkɔa.

<sup>6</sup> À wesagbanɔ pèɛɛɛ kpé pì kpɛɛɛ. Kpɛɛɛ pì gbàa kà gàsásuu baplaa akuri, à yàasa sɔ baaakuri. À gānu bò wesagba pìnɔ aɛ, ben à wesagbanɔ pèɛɛɛ à gbàadaaa dɔ gānu pì léa.

<sup>7</sup> À a kíblekita diɛ gānu pìn. Gwen è yā gɔgɔn, ben wè be Yákpækɛkɛ. À sida lí lèɛɛgɛɛnɔ nàna à gūa zaa tɔɔtɛ ai à sàtaa.

<sup>8</sup> À kpé kè è in kú aɛ. À bɔkɔba kɔn gānu pìo. Lɛn kpé kè à dɔ Fili'auna nénɔgbɛ kè à sè nɔɔ ũunɛ dɛ lɛ dɔ.

<sup>9</sup> Kpé pìnɔ bona, gbè maaanɔn wà ɛɛ dàɛo ai à gāa pé à sàtaa. Wà gbè pìnɔ yɔyɔ gbasa wà zɔzɔkɔɛ kɔn sagasigio kpa plaplaa píngi. Lɛɛɛ ua guu kpaa dɛ lɛ kɔn bàazi kpaaɔ.

<sup>10</sup> Wà kpé pìnɔ ɛɛ dàɛ kɔn gbè gbɛntɛ maaanɔ, à kenɔ gbàa kà gàsásuu kuri, à kenɔ sɔ sɔraagɔ,

<sup>11</sup> gbasa wà bò kɔn gbè maaa kè wà yɔyɔ wà ànɔ kɔn sida lío.

<sup>12</sup> À bīi bò à lìga ua bíta pìzi, à gbè kè wà ànɔ vī didikɔana dɔɔrɔ aagɔ, ben sida lí kè wà ànɔ kpákpa à musu, lán Dii kpé kɔn à gbàadaaaɔ ua bīi dɛ nà.

### *Dii ua pónɔ*

<sup>13</sup> Kí Sulemanu gbɛnɔ zì Huramu sísi zaa Taya, ben wà sùo.

14 Huramu pì da né Nafatali boriime, bensõ gyaanɔɔme. À de né Taya gbẽme, bensõ m̀gotẽ ɔ̀zikerime. Huramu pì wéézẽe vī kōn dōnao m̀gotẽ zī píngi guu. Kè à mò kí Sulemanu kiia, ben à zīi kè à dànè kè píngi.

15 À wesagba pì mèn plaa kōn m̀gotẽo. À píngi lezī kà gàsásuu baro plaasai, à lé yàasa s̄o kuri awεεplaa.

16 À à mífura pì kōn m̀gotẽo mèn plaa à di wesagba pìno musu. Mífura pìno lezī kà gàsásuu s̄oɔɔr̄o.

17 À m̀kyakoono pì, ben à fīfī à m̀ pìnoa lán kàmbεε bà, āo logologona mèn swεεplaa.

18 À póno pì lán biisio beεno bà à d̀d̀o wesagba m̀ pìnoa à ligazi d̀r̄o plaa, m̀kyakoo pìno ḡzī kōn à musuo. À m̀ pìnoo s̄enkpe píngi.

19 À Dii kpé gbàadaaa wesagba m̀ pìno pì kōn dōnao lán ítebaagunna vú bà. Ítebaagunna vú pìno lezī kà gàsásuu siisiiḡo.

20 Biisio beε pìnoo d̀d̀o wesagba m̀ pìno k̀d̀k̄ii musu mèn w̄aa doodo ligana m̀kyakoo pìnozi d̀r̄od̄r̄o.

21 Ben à wesagba pìno p̀εpεε kè āo Dii kpé gbàadaa k̄una. À t́ kpà ɔplaa kpa pónε Eé Káε, ɔzεε kpa pó s̄o Gb̄aaa Kúa.

22 Wesagba pìno m̀no b̀o lán ítebaagunna vú bà. Len à wesagba pìno pì le píngi.

23 À mò kàsa íkakii ū b̀otoko. À lé kè kpa ai à lé k̄aa kpa kà gàsásuu kuri, à lezī kà gàsásuu s̄oɔro, à lé yàasa s̄o baaakuri.

24 À ɔzĩ kè íkakiì pìà lán tùuno bà, à ligà à lezi gĩzĩ d̄òrɔ plaa, gàsásuu do píngi tùu mèn kuri. À íkakiì pì kàsa l̄edo k̄ɔn tùu w̄ezádee p̄ino.

25 Íkakiì pì di zùsware mèn kuri aw̄εεplaaano musu. Zù mèn aaḡɔno mi do gu'igb̄aroo kpa, mèn aaḡɔno ɔf̄ant̄eḡekpen kpa, mèn aaḡɔno s̄oomeɛ kpa, mèn aaḡɔno s̄ɔ f̄ant̄ɛboɛ kpa. Íkakiì pì di ñ musu, bens̄ āɔ p̄ɔno do do gura.

26 Íkakiì pì ḡegete kà ɔla yàasa ũ. À swā de lán oro swā bà, lán ítebaagunna swā bà. Ḡano lé wàa do ín è sí.

27 À tadib̄o pì k̄ɔn m̄ogot̄e mèn kuri. Āɔ píngi gb̄aa kà gàsásuu siiḡɔ, à yàasa do siiḡɔ, à lezĩ s̄ɔ aaḡɔ.

28 Kè wà tadib̄o p̄ino pì, wà m̄ò l̄etegeɛno kpà à gb̄ano dagura.

29 Ben wà músu w̄ez̄ano kè m̄ò l̄etegeɛ p̄ino píngi k̄ɔn zùsware w̄ez̄ano k̄ɔn kerubu w̄ez̄ano. Wà l̄ávuṭána w̄ez̄a kè músu p̄ino k̄ɔn zùswaree p̄ino musu k̄ɔn à ḡiz̄o.

30 Tadib̄o p̄ino m̄ogot̄e ḡorogba k̄ɔn ḡòo v̄i mèn siisiiḡɔ. Āɔ gb̄a v̄i mèn siisiiḡɔ do. Gb̄a p̄ino musun wè taa din. Wà gb̄a p̄ino kàsa, wà l̄ávuṭána w̄ez̄a kè à kpa siiḡɔa.

31 Tadib̄o p̄ino lé w̄ena b̄otoko, à lé kpaa b̄ona gàsásuu do, bens̄ à z̄oto kà ɔṭá do. Wà w̄ez̄a kè à lé kè b̄ò musua do. Tadib̄o p̄ino m̄ò l̄etegeɛ goodadeeno v̄i, āɔ de b̄otokoro.

32 Ḡorogba p̄ino kú m̄ò l̄etegeɛ p̄ino ḡiz̄i. À ḡono pép̄ena tadib̄o p̄ino gb̄ano. Ḡorogba p̄ino lezĩ kà gàsásuu do k̄ɔn a kusuo.

33 Wà ḡorogba p̄ino pì lán s̄goro p̄o bàme. Wà à

gòno kòn à górogbano kòn à m̀teeenò kòn à oroonò kàsa kòn m̀gotēo píngi.

<sup>34</sup> Tadibò pìno kùkii vī m̀n siisiigõ a goodano.

<sup>35</sup> Tadibò pìno musu de b̀otoko, à lezĩ kà otã do. À gbáno kòn à m̀ l̀etegēenò na tadibò pìno musu.

<sup>36</sup> À kerubu wēzã kè à gbáno kòn à m̀ l̀etegēenò kòn músu wēzãno kòn damina líno wēzãno, guu kè à è píngi. À lāvutãna wēzã kè à ligazi do.

<sup>37</sup> Len à tadibò pìno pì le. À kàsa pò d̀nkõ guume, aõ bítake kòn n̄ b̀nao s̀nkpe.

<sup>38</sup> Ben à dàga pì kòn m̀gotēo m̀n kuri. À píngi è í sí à kà gãno lé siisiigõ. Dàga pìno yàasa kà gãsasu siisiigõ. Kè à dàga pìno didi tadibò m̀n kuri pìno,

<sup>39</sup> ben à kàe Dii kpé ae, m̀n sooro oplazi, m̀n sooro ozezi. À íkakii pì diè ozezi Dii kpé gooda kè kú ofántèbòe soomete kpa sae.

<sup>40</sup> Ben Huramu oro túbukabòno kòn a séebòno kòn ta arusibòno pì do. Len à Dii ua zĩi kè kí Sulemanu d̀ne kè le, à à laata kpà píngi.

<sup>41</sup> Zĩi kè à kè pìnon yè: Wesagba m̀n plaa, à mì kè b̀ lán loo bà kè kú wesagba pìno musu m̀n plaa, m̀kyakoo kè à zã blèo à mì pìno m̀n plaa,

<sup>42</sup> biisio beε kè à d̀do m̀kyakoo pìno musu m̀n wàa plaa. À kè ai d̀ro plaa zãblebò ũ wesagba mì pìno.

<sup>43</sup> Tadibò pìno m̀n kuri kòn à dàgano m̀n kuri.

<sup>44</sup> Íkakii m̀n do kòn z̀swaree kè kú à gĩzĩno m̀n kuri awεplaa.

<sup>45</sup> Túbukabò pìno kòn a séebòno kòn ta arusibòno. Pò kè Huramu pì kí Sulemanune Dii ua pò ũuno píngi, à n̄ pí kòn m̀gotē l̀b̀naome.

46 Kína tò wà pò pìno kàsa kōn Yoda guò zaa Suko kōn Zarētāo dagura.

47 Sulemanu e tó wà pò kè wà pì kōn m̀ogotēo pìno yō kilooa à à t̀isi d̀ōro, kè à kè pari yānzi.

48 Sulemanu pò kè kú Dii kpé guuno pì d̀o, tuaeti-tikpatakii kè wà kè kōn vuraō kōn vura teebu kè wè Dii buređi káεao

49 kōn dabu kè wà kàε gānu guu kpéne ae ɔplazi kōn ɔzezio mèn sɔsɔro. Wà pì kōn vuraō atēε kōn à fitianɔ kōn à kpàkonɔ p̀ingi, wà lávu wēzā kè́mma.

50 À vura ímibɔnɔ pì d̀o kōn fitiadebɔnɔ kōn taanɔ kōn gōmbɔnɔ kōn tésibɔnɔ kōn kpéne kè wè be Ludakuki gbà asigbenɔ kōn gānu p̀onɔ.

51 Kè kí Sulemanu Dii ua zīi pì kè à yāa p̀ingi, ben à mò kōn vuraō kōn kondogio kōn pò kè a de Dauda diε Dii pò ũunɔ, ben à kà Dii ua auzikikaekiin.

## 8

### *Tana kōn Dii àkpato a kpén*

1 Ben kí Sulemanu Isaraili gbēnsinɔ s̀isi Yerusalemu, aō borii d̀on'aεdeenɔ kōn n̄ uabεdeenɔ n̄ p̀ingi, le aō mó wà Dii bà kuunańyo àkpato sé Dauda wéte kè wè be Zayon wà suo.

2 Ben Isarailinɔ kàkōa à ae n̄ p̀ingi m̀ swεεplaade Etanimu zībaaguroɔ zī.

3 Kè Isaraili gbēnsinɔ p̀ekōre n̄ p̀ingi, ben sa'orinɔ Dii àkpato pì sè

4 kōn dakōreki kutaao kōn Dii pò kè kú à guuno. Sa'orinɔ kōn Levi boriinɔ bé wà pò pìno sè wà s̀uo,

5 ben kí Sulemanu kōn Isaraili kè aō kàkōa à aenɔ saa ò kōn s̄aanɔ kōn z̀unɔ àkpato pì ae. Pò kè aō saa òo p̀inɔ parii kè bíta, èe sí naroro.



6 Ben sa'orinŋ gɛ̃ kŋn Dii bà kuunańyo àkpatis à kpén ai kpéne kè wè be Ludakukiin. Aŋŋ diè à dièkiia gwe kerubunŋ gĩĩ.

7 Kerubu pìnŋ dèbenŋŋ poroporona àkpatis pì kŋn à sélinŋla.

8 À séli pìnŋŋ gbàa ai wè n lé e Dii kpé gānu guu, mŋde wè e ua kparŋ. Lí pìnŋŋ kú gwe ai kŋn a gbāao.

9 Pókee kú àkpatis pì guuro, tó èe ke gbè walaa mèn plaa kè Musa dàn zaa Orɛbu, guu kè Dii bè a bà égŋ kú kŋn Isarailinŋ aŋŋ bŋna Iyipiti gberaa baasiro.

10 Kè sa'orinŋ b̀e Dii kpén, tésukpe kpé pì pà,

11 aŋŋe fŋ wà gɛ̃ wà n zĩi ke gwero tésukpe pì yānzi, zaake Dii gakui a kpé pà.

12 Ben Sulemanu bè: Dii bè égŋ kú tésukpe siaa guume.

13 Ben à bè Diine: Ma kpé naasidee kèkii b̀onne, n̄gŋ kú à guu gurŋ p̄ngi.

14 Ben à liè à ae d̀ pariia à sa maaa ònne.

15 Ben à bè: Wà Dii Isarailinŋ Luda sáabu kpá! À lé gbè ma de Daudane, ben à pàpa. Zaake à bè,

16 zaa gurŋŋ kè a a gbè Isarailinŋ b̀e Iyipiti, ée Isaraili wéte ke diè wà kpé bon arero. Daudan a sè a gbè Isarailinŋ d̀n'ae dee ũ.

17 Kè ma de Dauda yezi à kpé bo Dii Isarailinŋ Ludane,

18 ben Dii bène kpébonaare le a tó gŋ kúa laasuu kè à kè pì maa,

19 mŋde èe ke àpi bé eé boarero, à zĩnda né ke bé eé boare.

20 Ben Dii kè lán à à lé gbène nà. Ma gŋ ma de Dauda gɛ̃ ũ, ma v̄e Isaraili kpatan lán Dii

Isarailinŋ Luda à lé gbè nà, ben ma kpé kè bònε le à tó gŋ kúa yānzi.

<sup>21</sup> Gwen ma Dii àkpati diékii kèken. Dii bà kuuna kōn wa dezinŋ aŋ bōna Igipiti gbera yā kú à guu.

*Sulemanu aduakεna a gbēnŋε*

<sup>22</sup> Sulemanu aε dō Dii gbāgbākiiia Isaraili kè aŋ kakōana gweenŋ wāa n pīngi, ben à a ɔɔnŋ sè musu

<sup>23</sup> à bè: Dii Isarailinŋ Luda, gbēke è sí lékōzinyo musu ke tɔtɔero. N gbēkεε guu n bà kú kōn n zòbleri kè aŋ tē n zén kōn nòε doonŋ.

<sup>24</sup> N yā kè n à lé gbè n zòbleri ma de Daudanε pàpa. N ò kōn léome yā, gbāa san n pàpa.

<sup>25</sup> Tia sa Dii Isarailinŋ Luda, n lé gbè n zòbleri ma de Daudanε n bè, tó à boriinŋ n zīnda kūna dō bensō aŋ tē n zén lán à tézi nà, aŋégŋ kú Isaraili kpatan gurŋ pīngi.

<sup>26</sup> Isarailinŋ Luda, n tó yā kè n ò n zòbleri ma de Daudanε ke yāpuraa ū sa.

<sup>27</sup> Mōde Luda, négŋ kú tɔtɔε kè yāpuran yó? Musu kōn a lezīkεε é fŋ à n síro, benle kpé kè má bōnnεε kèkii saó?

<sup>28</sup> Dii ma Luda, n làakari dō mapi n zòbleria, n ma aduakεna kōn ma agbaakpanannεεo sí. N swā kpá wiii kè mapi n zòbleri mée pεenziizi kōn adua kè mée kεemmao gbāa.

<sup>29</sup> N tó n wée gŋ pena kpé kèkiiia gwāavī kōn fāantēo, guu kè n bè n tó égŋ kúa kèkii pì. N adua kè mapi n zòbleri mée kεε aedōna guu kèkiiia ma.

<sup>30</sup> Tó mapi n zòbleri ke n gbē Isarailinŋ aε dō guu kèkiiia, tó wa wée kemma, nŋae wa wéekεna sí zaa n kúkiia musu n sùu kεwao.

<sup>31</sup> Tó gbē taari kè a gbēdaaane, ben wà bène à la da, tó à mò à la dà n gbāgbākii kè ae,

<sup>32</sup> ñgae zeńyo zaa n kúkiia musu ñ ɔɔańne. Ñgae yā gōgō n zòblerinɔne ñ yā da taarideela, ɛ à yākena wí à musu ñ yā nnaa kpá taarisaidēea, ɛ wà e wà dō kè à yāke vīro.

<sup>33</sup> Tó n gbē Isarailinɔ ibeenɔ zì blēm̄ma durun kè aō kènne yānzi, aō tányo, tó aō ɛara wà ae dōmma wà n sisi, tó aō wée kēm̄ma wà agbaa kpànnē kpé kēkiia,

<sup>34</sup> zaa n kúkiia musu ñgae zeńyo ñ sùu keńyo kōn n durunɔ, ñ ɛarańyo būsu kè n kpà n dezina kèkii pì guu.

<sup>35</sup> Tó ludambēe gè da wáawaa, lou gí mazi kè aō durun kènne yānzi, tó aō ae dō guu kēkiia aō wée kēm̄ma aō n sisi, bensō aō kpēe li n durunne kè n wée tām̄ma yānzi,

<sup>36</sup> zaa n kúkiia musu ñgae zeńyo ñ sùu keńyo kōn n durunɔ. Ñgae n da zé maaan, né tó lou ma n būsu kè n kpà n gbēnɔa aō pó ũu kè guu.

<sup>37</sup> Tó dekaa ke gagyāa kà būsu kèn, ke pówēepōsi ke pópukpana ke sutēnɔ ke kwaanɔ ke tó ibeenɔ liga n wéte kezi ke tó mónzi ke gyāa gè n té,

<sup>38</sup> tó aō gbēke yā kè à a lee dō, tó à a ɔɔ dō kpé kèkii kpa, tó à wée kēm̄ma à agbaa kpànnē,

<sup>39</sup> zaa n kúkiia musu ñgae zeo ñ sùu keo, né ɔɔale. Ñgae fīa bone a yākenaa, zaake n à nòse dō. Mbe n baade píngi nòse dō.

<sup>40</sup> Len aōégō vīa keenne ɛ ai n wēndi lén būsu kè n kpà n dezina kè guu.

<sup>41-42</sup> Zaake weé n tó bíta kōn n gāsā gbāaao kōn

n ɔɔ kè poronao baaru ma, tó gbē zĩtɔ kè de n gbē Isaraili borii ũroo bò b̀usu z̀aazān à mò n tó yānzi, tó à aε d̀ò kpé k̀èa à ẃéε k̀emma,

<sup>43</sup> zaa n kúkiia musu ñgae zεo ñ yā kè à ẃéε k̀emmaa kεne, le anduna bori píngi e à n tó d̄s, wà v̄ia kenne lán n gbē Isarailinɔ è kenne nà, āséǵō d̄s kè n tó kú kpé kè má b̀ò k̀èa.

<sup>44</sup> Tó n gbēnɔ b̀òe wà g̀aa z̄i ká k̄ɔn n̄ ibεεnɔ, baa guu kè n n̄ z̄in píngi, tó ās aε d̀ò ẃéte kè n̄ sè k̀èa k̄ɔn kpé kè má b̀onnεε k̀èo, tó ās ẃéε k̀emma,

<sup>45</sup> zaa n kúkiia musu ñgae zεñyo agbaa kè āɔ kp̀anne yānzi, ñ yā nnaa kp̀ámma.

<sup>46</sup> Zaake gbēke è gí durun keziro, tó ās durun k̀enne, tó n p̄o f̄éñzi n n̄ ná n̄ ibεεnɔne n̄ ɔz̄i, tó ās tànyo n̄ b̀usun z̄izɔnɔ ũ b̀usu z̀aazā ke à k̄iin yoo,

<sup>47</sup> tó ās ǹòse liε b̀usu kè āɔe z̀ò bleen p̄i guu, tó ās èara wà agbaa kp̀anne gwe wà bè: Wa durun kè, wa taari kè, wa yā zaaa kè,

<sup>48</sup> tó ās aε d̀òm̄ma k̄ɔn ǹòseo do k̄ɔn p̄oyezinao píngi zaa b̀usu kè āɔe z̀ò bleen n̄ ibεεnɔne p̄i guu, tó ās aε d̀ò b̀usu kè n̄ kpà n̄ dezinɔa k̄ɔn ẃéte kè n̄ sèo k̄ɔn kpé kè má b̀onnεε k̀èoa, tó ās ẃéε k̀emma,

<sup>49</sup> zaa n kúkiia musu ñgae zεñyo agbaa kè āɔ kp̀anne yānzi, ñ yā nnaa kp̀ámma.

<sup>50</sup> Ñgae s̀uu ke k̄ɔn n gbē kè ās durun k̀ennεεnɔ k̄ɔn taari kè āɔ k̀èo, ñ tó gbē kè āɔe z̀ò bleéñnεnɔ n̄ w̄enda gwa,

<sup>51</sup> zaake n p̄óv̄inanɔmε, n gbē kè n n̄ b̀óε Igitipinɔ ẃétám̄ma p̄ās̄i guunɔmε.

<sup>52</sup> Ñ tó n ẃéε ḡs kú mapi n z̀òbleria, ñ swā kpá agbaa kè má kp̀annεεzi k̄ɔn agbaa kè n gbē

Isarailinŋ kpànnεεo. Ñ swā kpáñzi gurɔɔ kè aɔ̄ wii pèenzi píngi.

<sup>53</sup> Dii Luda, zaake anduna bori píngi guu aɔ̄pinɔn n ní sé n gbēnŋ ũ, lán ní ò n zòbleri Musa gāzĩ nà gurɔɔ kè n wa dezinŋ b̀ε Iyipiti.

<sup>54</sup> Gurɔɔ kè Sulemanu e wéε keε Diia, à kuena a kosooame kɔn à ɔɔnɔ porona musu. Kè à adua kè à yàa, ben à fεε à zè Dii gbāgbākiiia gwe,

<sup>55</sup> ben à sa maaa ò Isaraili kè aɔ̄ kú gweenɔne ní píngi, à ò gbāngbān à bè:

<sup>56</sup> Wà Dii sáabu kpá, zaake à wamɔwa a gbē Isarailinŋ gbà ãampakii lán à ò nà. Yā maaa kè à à lé gbè a zòbleri Musa gāzĩnŋ pàpa píngi, à kee e léε páro.

<sup>57</sup> Dii wa Luda gɔ̄ kúwao, lán à kú kɔn wa dezinŋ nà. Àton wa tónlo, àton pā kpáwaziro.

<sup>58</sup> À tó wà swè gɔ̄ kúawa wàgɔ̄ té à zén, wàgɔ̄ à yādienanŋ kūna kɔn yā kè à dà wa dezinŋnenŋ, wàgɔ̄ à ɔɔkii gwaa.

<sup>59</sup> Adua kè má kè Dii wa Ludaa gɔ̄ dɔn fāantē kɔn gwāavĩo. Àgɔ̄ yā nnaa kpá mamɔma a zòbleria kɔn a gbē Isarailinŋ lán guu e dɔɔ nà,

<sup>60</sup> anduna bori píngi é à dɔ̄ kè Dii né Ludame, à pāndee kuuro.

<sup>61</sup> À kù à a swè kpá Dii wa Ludaa mámmam, àgɔ̄ à ɔɔkii gwaa, àgɔ̄ à yādienanŋ kūna lán á kūna gbàa nà.

### *Dii ua kyakena*

<sup>62</sup> Ben kína kɔn Isarailinŋ ní píngi saa ò Diia.

63 Sulemanu kennakɔ̄o saa ò Diia kɔ̄n zùno bɔ̄rɔ baro awɛɛplaa kɔ̄n sãano bɔ̄rɔ baswɛɛdo. Len kina kɔ̄n Isarailinó ń píngi Dii ua kya kè ɛ.

64 Zĩ pìà kina gbãsí gò ua kè kú Dii kpé aea, ben à sa'opɔ̄ kè wè ká tén à té kũ ò gwe kɔ̄n pówɛɛ gbaao kɔ̄n kennakɔ̄o sa nósio, zaake sa'okii kè à kè kɔ̄n m̀gotɛ̀o kè kú Dii kpé aɛ bítarɔ, èe fĩ à sì píngiro.

65 Zĩ beeea Sulemanu kɔ̄n Isarailinó ń píngi zĩbaa kè Dii ń Ludane ai gurɔ swɛɛplaa, ben aɔ̄ Kutadɔna zĩbaa kè gurɔ swɛɛplaa dɔ. À píngi kè gurɔ gẽro dosai. Wà pari maamaa, wà b̀ zaa Lebo Amata ai à gàa pé Igipiti gulezɛki swaaa.

66 À gurɔ sɔraagɔdee zĩ à ń gbáɛ, ben aɔ̄ lé zàa aɔ̄ tà ń be kɔ̄n pɔ̄nnaao. Aɔ̄ pɔ̄ kè nna yã maaa kè Dii kè a z̀bleri Dauda kɔ̄n a gbẽ Isarailinóne píngi yãnzì.

## 9

### *Dii b̀ à m̀na Sulemanuzi*

1 Kè Sulemanu Dii ua kàɛ à yãa kɔ̄n a uao kɔ̄n zĩ kè à pɔ̄ kúano píngi,

2 ben Dii èara à b̀ à m̀zi à gèn plaadeeo lán à b̀ à m̀zi Gibiɔ̄ nà

3 à bène: Ma adua kè ń kè kɔ̄n agbaa kè ń kpàmeɛo mà. Ma kpé kè ń b̀ pì diɛ ma pó ũ, ma tó égɔ̄ kúa yãana sai. Ma wée égɔ̄ kúa, ma pɔ̄ égɔ̄ kúa.

4 Mpi sɔ̄, tó ń té ma zén súusu kɔ̄n ǹse puraao lán n de Dauda bà, tó ń yã kè má diennɛɛnó kũna kɔ̄n ma yã'onnenanó, tó née ma ɔ̄ɔkii gwaa,

5 mé n kpata kásaa péɛ Isarailinó té, ééɔ̄ yãana vĩro, lán ma à lé gbè n de Daudane nà, ma bè à boriinó égɔ̄ kú Isaraili kpatan gurɔ píngi.

6 Tó mpi ke n nénŋ kpεε lìme sŋ, tó á ma dokayānŋ kŋn yā kè má diεareenŋ kŋnaro, tó a gaa a dŋ tāanŋzi ai ée n gbāgbāa,

7 mé Isarailinŋ bŋε bŋsu kè má kpàrŋman, mé gí kpé kè má diε ma pŋ úu pizi, aŋé gŋ fabona pŋ ū, pena pŋ ū bori píngine.

8 Baa kŋn kpé pì naasikεεŋ, à yā é bŋ gbē kè aŋεε gētεε à saenŋ saε. Aŋé sio gá wà be: À kè dia Dii kè bŋsu kè kŋn kpé kèonε lεε?

9 Weé beŋne: Kè aŋ pā kpà Dii n Luda kè à n dezinnŋ bŋε Igipitizi yānzime. Aŋ zè kŋn tāanŋ, aŋεε n gbāgbāa aŋεε kuεεŋne. Beeε yānzin Dii mŋnzi beεε kpàŋzi píngizi.

### *Sulemanu yākena kpaaanŋ*

10 Sulemanu ua mèn plaa pinnŋ kàε wè baromε, Dii ua kŋn à zīnda uao. Beeε gberan

11 à Galili bŋsu wéte kpà Taya kí Hiramua mèn baro, zaake Hiramua sida lí kŋn pini líŋ kŋn vuraŋ kpàa lán à yezi nà.

12 Kè Hiramua bŋ Taya à gāa à wéte kè Sulemanu kpàawaanŋ gwà, èε kenεro,

13 ben à bè: Ma gbē, wéte kpareε takanŋn n kpàma gwee? Ben wà tŋ kpà guu pinnε Kabululu ai kŋn a gbāao.

14 Hiramua gīake à vura kpàsā Sulemanunε yā tŋn siigŋ.

15 Gbē kè Sulemanu n dá zŋzīinnŋ yān yè. Gbē pinnŋ bé wà Dii ua kŋn Sulemanu uao zīi kè. Aŋ Milo wéε tāta kŋn bŋsuo, aŋ Yerusalemu bīi bŋ, aŋ èara wà Azo kŋn Megidoo kŋn Gezaŋ kèkε wà kàε.

16 Igipiti kí Fili'auna lèε Geza pīa yā, ben à si à té sŋa à Kanaa kè aŋŋ kú à guunŋ dèdε, ben à

kpà a nénɔgbēa zākɛna gbaa ũ gurɔɔ kè à à kpàsā Sulemanua.

17 Ben Sulemanu èara à Geza pì kèke à kàe kɔn Bɛtoroni gĩzĩ pɔɔ

18 kɔn Baalao kɔn Tadamɔ kè kú à bùsu gbáan-o

19 kɔn wéte kè à kūsāe kàennɔ kɔn wéte kè à sɔgoronɔ kɔn à sɔnɔɔ kúnno kɔn kpé kè à yezi à dɔ Yerusalemunɔ kɔn Lebanɔ kɔn bùsu kè èe kí bleeannɔ píngi.

20 Borii kè aɔ de Isaraili ũroonɔ: Amɔrinɔ, Itinɔ, Pɛrizinɔ, Ivinɔ kɔn Yebusi kè aɔ gɔnɔ n píngi,

21 gbē kè Isarailinɔ e fɔ wà n dɛderoonɔ, aɔ borii kè aɔ gɔ n bùsu pinnɔn Sulemanu n dá zòzĩin, ben aɔègɔ zĩi pì kee le ai kɔn a gbáao.

22 Èe Isarailinɔ da zòzĩinlo. Aɔmbe à n díe a zìkpɛɛnɔ ũ, a ibanɔ, a kína daanɔ, a gbēnɔ dɔn'aedeennɔ, a sɔgorodeennɔ, a sɔdeennɔ.

23 Aɔmbe zĩi kè wèe kee pì gbēnsinɔ ũ dɔ, aɔ gɔɔn wàa plaa kpé baswɛɛplaa akuri.

24 Kè Fili'auna nénɔgbē bò Dauda wéte à tà a kpé kè Sulemanu bònɛn, à gberan Sulemanu Milo wèe tàta.

25 Wè kɔn wèo Sulemanu ègɔ saa oo gèn aagɔgɔ. È sa'opɔ kè wè ká tén à té kũ kɔn kennakɔso sa'opɔo o sa'okii kè à bò Diinea, è tuaetiti kpata Dii aɛ gwe dɔ. Len à Dii ua zĩinɔ kè le mámmam.

26 Kí Sulemanu góro'itenɔ kè Eziɔ Gɛba Elata sae Edɔmunɔ bùsun Isia Tēa léa.

27 Hiramun a górodee kè aɔ ísíaa dɔɔnɔ zì, ben aɔ dà ísíaala lɛdo kɔn Sulemanu gbēnɔ.

28 Aɔ gàa Ofi, aɔ vura sèe gwe tɔn gēro aɔ sùo kí Sulemanunɛ.



# 10

## *Seba b̀usu ḱina k̀e de nɔgb̃e ũ m̀ona Sulemanu kiia*

<sup>1</sup> K̀e Seba b̀usu ḱina k̀e de nɔgb̃e ũu mà lán Sulemanu t́ò b̀ò nà Dii yá musu, ben à m̀ò à ỹò à gwa k̃n yágbekana z̃í'ũuo.

<sup>2</sup> À kà Yerusalemu k̃n a ìbanɔ paripari k̃n p̀ó gũ nnannaanɔ k̃n vura sà bítao k̃n gb̀e b̀eɛdee k̀e lakuminɔ sɛnanɔ, ben à g̀aa Sulemanu kiia à yá k̀e kú a ǹòsɛ guu f̀aadi b̀òo p̀íngi.

<sup>3</sup> Ben Sulemanu yá k̀e à làlaanɔ b̀òk̀tɛnɛ p̀íngi. À ke b̀òk̀tɛna e à furo.

<sup>4</sup> K̀e nɔgb̃e p̀ì Sulemanu ɔ̀nd̃yãnɔ mà p̀íngi, bens̃ à à b̀eɛ k̀e à b̀ò è

<sup>5</sup> k̃n p̀óblee k̀e è bleenɔ k̃n à ìbanɔ gwenao k̃n à b̀e z̃ík̃erínɔ kuunao k̃n ní p̀ókásãanɔ k̃n à w̃k̃paaterínɔ k̃n sa'opɔ k̀e ẁe ká tén à té kũ k̀e à ò Dii uanɔ, yá p̀ì à k̀ù gb̃ãa, ben à lé àɛ.

<sup>6</sup> Ben à b̀e ḱinanɛ: N yákenanɔ k̃n n ɔ̀nd̃ baaru k̀e má mà zaa ma b̀usun-o né yápuramɛ.

<sup>7</sup> M̀éɛ yá p̀ínɔ síro ai ma gaa ma kao k̀e, ben ma ẁéɛ siàlɛ sa. Ẁèe omɛ p̀íngi sero fá! N ɔ̀nd̃ k̃n n auzikinɔ de lán ma à baaru mà nàla z̃à.

<sup>8</sup> M̀innadeenɔ n gb̃enɔ ũ k̃n n ìba k̀e ãɛ̀g̃ kúnuyo gurɔ p̀íngi, ãg̃ n ɔ̀nd̃yã maanɔ!

<sup>9</sup> Wà Dii n Luda sáabu kpá, zaake n yá kàne, ben à n ka Isarailinɔ ḱín. Yenzi k̀e Dii ṽí k̃n Isarailinɔ gurɔ p̀íngi bé à tò à n ka ḱí ũzi, lɛ ñg̃ yá g̃g̃ɔ̀nne a z̃éa.

<sup>10</sup> Ben nɔgb̃e p̀ì ḱina gb̀a vura t̃n siig̃ k̃n p̀ó gũ nnannaanɔ paripari maamaa k̃n gb̀e b̀eɛdeenɔ. P̀ó gũ nnannaa k̀e à ḱí Sulemanu gb̀a p̀ínɔ bíta, gb̃ekee e m̀ónɛ à kà lɛ ziki d̃ro.

11 Hiramu góro'ite kè aǎ sù kǎn Ofio kǎn vuraonŏ sù kǎn lí bèedeeno maamaa kǎn gbè bèedeeno dŏ.

12 Ben kína Dii ua pónŏ kèò kǎn a zĩnda be pónŏ, à mŏrŏnŏ kǎn kúunŏ kèò lèsirinŏne dŏ. Wèe mó kǎn lí pì borio à kà le ziki dŏro, wèe wée si à takale dŏro ai kǎn a gbàao.

13 Pŏ kè Seba bùsu kína pì yezi píngi à gbèka kí Sulemanua, ben à à gbà, gbaa kè à kène yŏnkŏyŏnkŏnŏ baasi. Ben à èara à tà a bùsun kǎn a ibanŏ.

### *Sulemanu gakuikεε*

14 Vura kè è gē Sulemanuzi wè kǎn wèò è ká tŏn baro awεε'aagŏ,

15 tángba kè táa'orino kǎn latarino kǎn Larubu kínano kǎn a bùsu gběnsino è móone baasi.

16 À sɛngbango bítanŏ kè kǎn vura kè wà gbègbèò mèn wà do, aǎ baade tìisi kà kiloo aagŏgŏ kǎn a kusuo.

17 À sɛngbango néngonŏ kèò dŏ, aǎ baade tìisi yezi à ká kiloo plaplaa. À sɛngbango pino kàε kpé kè wè be Lebano Líkpen.

18 Kína kiblekita bíta kè kǎn wesa swaao, ben à vura atēe kùea.

19 Kita pì didikii vī, à gbápeekii mèn swεedo. À kpεenaki musu de mŏŏŏ gooda sai. À gāsādikiinŏ vī, músu taka kè wà kènŏŏ zεzεna gāsādikii pino sae.

20 Músu pinoŏ zεzεna gbápeekii pinoa kpa plaplaa, à píngi kà kuri awεεplaa. Wèe kita pì taka ke bùsu ken zikiro.

21 Kí Sulemanu togoonŏ né vurame píngi. Kpé kè wè be Lebano Líkpe pónŏ píngi né vurame atēe.

Kondogi pókee kú gwero, zaake wè kondogi die póke ũ Sulemanu gurɔɔaro.

<sup>22</sup> Kína góro'itenɔ ègɔ dana ísiaala kɔn HIRAMU góronɔ. Wè aagɔ píngi aɔègɔ suu kɔn vuraɔ kɔn kondogio kɔn wesa swaao kɔn gbakũɔ kɔn zãɔ.

<sup>23</sup> Kí Sulemanu auziki kɔn à ɔndɔɔo bíta de anduna kínanɔ póla n píngi.

<sup>24</sup> Baade píngi e zé wetee à wée si Sulemanule à à ɔndɔyã kè Ludaa dànɛ à swèn ma.

<sup>25</sup> Wè píngi baade ègɔ mɔɔnɛ kɔn a gbaao: Kondogi pónɔ, vura pónɔ, utanɔ, gɔkebɔɔɔ, pɔ gũ nnanaanɔ, sɔnɔ kɔn bãagãsɔnɔ.

<sup>26</sup> Sulemanu sɔgoronɔ kɔn sɔnɔ kàkɔa. À sɔgoro pìnɔ kà waa swεεplaa, à sɔnɔ sɔ bɔɔɔ kuri awεεplaa. Wè à sɔ pìnɔ gwa à sɔgoro wétɛnɔ guu kɔn à bɛ Yerusalemuo.

<sup>27</sup> Kína tò kondogi gɔ di Yerusalemu lán gbè bà, bensɔ sida lí kè wè kpé ɔɔo pari lán bètɛ lí bà sèn.

<sup>28</sup> Wè bɔ kɔn Sulemanu sɔ pìnɔ zaa Iyipiti kɔn Silisia bùsuome. Kína latarinɔ bé wè gá lúlu gwe.

<sup>29</sup> Aɔè sɔgoronɔ lúlu Iyipiti kondogi ɔɔ mèn waa aagɔmɛ, sɔnɔ sɔ mèn baswεεplaa akuri, ben è ɛara à sɔ pìnɔ yá Iti kínanɔa kɔn Sirianɔ kínanɔ.

## 11

### *Sulemanu nɔɔnɔ*

<sup>1</sup> Kí Sulemanu yè bori pãnde nɔgbɛnɔzi pari. Fili'auna nénɔgbɛ baasi, ben à Mɔabunɔ kɔn Amɔninɔ kɔn Edɔmunɔ kɔn Sidɔdeenɔ kɔn Itinɔ sèse nɔɔnɔ ũ.

<sup>2</sup> Dii bè Isarailinŋe aŋton borii pìno séro, zaake aŋé n̄ sāsāme, le aŋó té n̄ tāanŋzi. Baa kŋn beeeo aŋ yenzi Sulemanu swè blè.

<sup>3</sup> À kíneno sèse nŋŋŋ ū gŋŋŋ wàa aagŋ kpé basŋŋro, bensŋ à nŋ yìgisainŋ vī dŋ wàa do kpé basŋŋro. Ben à nŋŋ pìno à sāsā.

<sup>4</sup> Kè zikū e gēen, à nŋŋŋ tò à tè tāanŋzi, èe a swè kpá Dii a Ludaa mámmam lán a de Dauda bàro.

<sup>5</sup> À tè Sidŋdeeno taa Asatorenzi kŋn Amŋninŋ taa Mŋlɛki kè Luda zàn-o.

<sup>6</sup> À yā kè Dii yeziroo kè, èe tézi kŋn n̄sɛo do lán a de Dauda bàro.

<sup>7</sup> Ben à gāa à tāagbāgbākii bò s̄s̄i kè kú Yerusalemu ɔfāntɛbŋe kpaa musu Mŋabunŋ taa gina Kemŋsinɛ kŋn Amŋninŋ taa gina Mŋlɛkio.

<sup>8</sup> Len à kè le a bori pānde nŋŋŋne n̄ píngi, ben aŋ tuaetiti kpàta n̄ tāanŋne aŋ saa òm̄ma.

<sup>9</sup> Ben Dii Isarailinŋ Luda pŋ fè Sulemanuzi, kè à kpɛɛ l̄ne à swè kúa dŋro yānzi, zaake Dii bò à m̄zi yā gēn plaa.

<sup>10</sup> Baa kè Dii bène, àton té tāanŋziro, èe yā kè Dii d̄ie p̄i maro.

<sup>11</sup> Ben Dii bène: Zaake n̄ kè le, n̄eɛ ze kŋn ma bà kuunanyo yā kè má d̄iennɛɛoro, mé kpata bŋ n̄ ɔz̄i mà n̄ z̄bleri ke ká n̄ gēɛ ū.

<sup>12</sup> M̄de n̄ de Dauda yānzi mé ke le n̄ gurŋŋaro, n̄ n̄n̄ mé kenɛ.

<sup>13</sup> Baa kŋn beeeo mé kpata bŋ à ɔz̄i mámmanno. Bori leo doon mé tó n̄ né p̄ine ma z̄bleri Dauda kŋn Yerusalemu kè má sè ma p̄o ūuo yānzi.

*Sulemanu ibɛnŋ*

14 Ben Dii tò Ɛdɔmu gbẽ Adada kè de wẽene ũ íbetɛ kpà kɔn Sulemanuo.

15 Gurɔɔ kè Dauda e zì kaa kɔn Ɛdɔmunɔ yã, à zìkpɛɛnɔ dɔn'aɛdee Yoabu gàa à Isarailinɔ gènɔ v̄i, ben à Ɛdɔmunɔ bùsu gɔgbẽnɔ dèdɛ gwe n̄ píngi.

16 Àpi kɔn a gbẽnɔ kú gwe ai mɔ swɛɛdo ai aɔ gàa wà Ɛdɔmunɔ bùsu gɔgbẽ pìnɔ dèdɛo n̄ píngi.

17 Kè Adada bàa sì, èe taa Iqipiti kɔn a de iba kenɔ. Gurɔ beee a sɔ Adada né gɔkparemɛ.

18 Aɔ bò Midiã aɔ gàa Parani, ben aɔ Paranide kenɔ sè wà gàaño Iqipiti kí Fili'auna kiia. Fili'auna kpé kpàa kɔn pɔbleeo kɔn tɔtɛo.

19 Adada yã kà Fili'aunanɛ maamaa, ben à a naɔ Tapɛnesi dāaro kpàa nɔɔ ũ.

20 Ben Tapɛnesi dāaro pì né ì gɔgbẽ ũ, wè benɛ Genuba, ben Tapɛnesi né pì gwà Fili'auna ua kɔn Fili'auna n̄nɔ ƙɛdo.

21 Gurɔɔ kè Adada kú Iqipiti, à mà kè Dauda gà bensɔ à zìkpɛɛnɔ dɔn'aɛdee Yoabu gà dɔ. Ben à bè Fili'aunanɛ: N̄ ma gba zé mà tá ma bùsun.

22 Ben Fili'auna à là à bè: Bó bé èe kēsāamma ma kiia, kè tò n̄ yezi n̄ tá n̄ bùsun? À wèala à bè: Pókee e kēsāamaro, n̄ ma gba zé dé!

23 Ben Ludaa tò dɔ Eliada né Rezɔ kè bàa sì a dii Zoba kí Adadɛzanɛ yã f̄ɛ Sulemanuzi.

24 Kè Dauda Adadɛza gbẽnɔ dèdɛ, ben Rezɔ gbẽnɔ kàkɔaazi aɔ kè gbāamɔnnerinɔ gāli ũ, ben à ḡ n̄ dɔn'aɛdee ũ. Aɔ gàa wà v̄ɛ Damasiku, ben à gwee sì.

25 Rezɔn Isarailinɔ ibɛɛ ũ ai Sulemanu w̄ndi lén, yákete kè Adada f̄ɛo baasi. À kpata blè Siria bùsun, à ḡ Isarailinɔ k̄zi.

*Yeroboamu bɔna Sulemanu kpɛɛ*

<sup>26</sup> Nɛbati né Yeroboamu né Sulemanu ìba kemɛ. Eflaimu boriimɛ, kɛ̀ bɔ̀ Zɛɛda, ben à bɔ̀ Sulemanu kpɛɛ. À da né gyaanɔɔmɛ, à tɔ́n Zɛrua.

<sup>27</sup> Lán à kɛ̀ nà à bɔ̀ kína kpɛɛn yɛ̀. Sulemanu wɛ̀ɛ kɛ̀ wɛ̀ be Milo tàta bùsuo, ben à a de Dauda wɛ̀tɛ bīi bɔ̀ à pɛ̀kɔ̀rɛ.

<sup>28</sup> Yeroboamu né négɔ̀gbɛ̀ làakarideemɛ. Kɛ̀ Sulemanu è kɛ̀ òwazi pì aīa vī, ben à à diɛ zī gbāaa kɛ̀ Yusufu boriinɔ̀ e kɛɛ pì gbɛ̀nsi ũ.

<sup>29</sup> Gurɔ̀ beeean Yeroboamu bɔ̀ Yerusalemu, ben à dàkɔ̀rɛ kɔ́n annabi Ahia, Silo gbɛ̀o zén, à uta dufu dana. Aɔ̀ kú sɛ̀n gwe n̄ plaa.

<sup>30</sup> Ben Ahia a uta dufu pì gà à kɛ̀ à pàrapara lɛ̀o kuri awɛɛplaa.

<sup>31</sup> Ben à bè Yeroboamunɛ à à parana pì sɛ̀ɛ mèn kuri, zaakɛ Dii Isarailinɔ̀ Luda bè: Mé Sulemanu bɔ̀ kpatammɛ mà Isaraili bori lɛ̀o kuri kpámma.

<sup>32</sup> Mé bori lɛ̀o doo tónɛ ma zòbleri Dauda kɔ́n Yerusalemu kɛ̀ má sè Isaraili bori píngi wɛ̀tɛnɔ̀ tɛ̀o yānzi.

<sup>33</sup> Mé kɛnɛ lɛ, kɛ̀ à ma zīnna à gà à Sidɔ̀deeno tāa Asatorɛ kɔ́n Mɔ̀abunɔ̀ tāa Kemɔ̀sio kɔ́n Amɔ̀nino tāa Mɔ̀lekio gbāgbāa yānzi. Èe tɛ̀maziro, èe yā kɛ̀ maamɛ kero, èe ma ɔ̀ɔ̀kii gwaro, à ma dokayānɔ̀ kūna lán a de Dauda bāro.

<sup>34</sup> Baa kɔ́n beeeo mé kpata bɔ̀ à ɔ̀zī māmmanlo, zaakɛ ma gīakɛ ma à kɛ̀ kí ũ ai a wɛ̀ndi lémmɛ ma zòbleri Dauda kɛ̀ má sè yānzi, kɛ̀ à ma yādienanɔ̀ kūna bensɔ̀ à ma ɔ̀ɔ̀kii gwà.

<sup>35</sup> À nén mé kpata sí à ɔ̀zī, mà Isaraili bori lɛ̀o kurinɔ̀ kpámma.

<sup>36</sup> Isaraili bori leo doon mé tó à né pìne, le ma zòbleri Dauda borii gō kí bleeme Yerusalemu guro píngi, wéte kè má sè ma tó gō kúa pì.

<sup>37</sup> Mpi sō, ma n se Isarailino kína ũ, le ñgō kí blee pō kè n pō yezia píngi.

<sup>38</sup> Tó née yā kè má diennee kee píngi, tó ñ témazi, née yā kè maamee kee, tó née ma òòkii gwaa bensō ñ ma yādienano kūna lán ma zòbleri Dauda bà, mégō kúnyo, mégō n boriino kaa Isaraili kpatan guro píngi, lán ma Dauda boriino kàn nà.

<sup>39</sup> Mé Dauda boriino eara kpee yā kè aō kè pì yānzi, mōde èe ke ai guro pínginlo.

<sup>40</sup> Sulemanu zé wète à Yeroboamu de, ben à fèe à bàa sì à tà Igipiti kí Sisaki kiia, à gō gwe ai Sulemanu gàa à gào.

<sup>41</sup> Sulemanu yā kpaaano kōn òndōyā kè à kèno píngi kú Sulemanu yāno takadan.

<sup>42</sup> Sulemanu kè Isaraili bori píngi kína ũ Yerusalemu wè baplaame.

<sup>43</sup> Kè à gà, wà à vli à de Dauda wéte, ben à né Reoboamu vèe à gbèn.

## 12

### *Isarailino bōna Reoboamu kpee*

<sup>1</sup> Reoboamu gàa Sekemu, zaake gwen Isaraili bori píngi gāan le wà à ká kí ũ.

<sup>2</sup> Kè Nebati né Yeroboamu à baaru mà, ben à bò Igipiti à sù, zaake gwen à kún zaa guro kè à bàa sì Sulemanune.

<sup>3</sup> Ben Isaraili kè aō kō kàkōa pino à sisi, ben aō gàa wà yā ò ledo kōn Reoboamuo wà bè:

<sup>4</sup> N de zī gbāaa dawe pāsīpāsī. Mmɔn sɔ, n zī gbāaa pì kɔn aso tìisi kè à dīweeo lago, wé m̀ siennε.

<sup>5</sup> Ben à wèńla à bè: À tá gīa ai gurɔ aagɔ, gbasà à εara à mó. Ben aɔ tà.

<sup>6</sup> Kí Reoboamu yā pì gbà gbēnsi kè aɔ de a de Sulemanu ɪba ūunɔnε à bè: Yā kpāreen á è à maa mà sí gbē pìnɔlaa?

<sup>7</sup> Ben aɔ wèàla wà bè: Tó n m̀ siénnε gbàa, ben n yā maaa sìnla, aɔégɔ de n zòblerinɔ ū gurɔ pínɡi.

<sup>8</sup> Ben Reoboamu g̀i gbēnsi pìnɔ lédammazi, à g̀aà à yā pì gbà a ɪba gɔkpāre kè aɔ né blè ledoonɔnε.

<sup>9</sup> À n lá à bè: Gbē kè aɔ bèmε mà zī gbāaa kè ma dee dànnε lagońnε pìnɔ, yā kpāreen á è à maa wà sínlaa?

<sup>10</sup> Ben gɔkpāre pìnɔ wèàla wà bè: Gbē kè aɔ bènnε n de aso tìisi dinnε n lagońnε pìnɔ, n ońnε n ɔnezāa gbère de n de piila.

<sup>11</sup> N de aso tìisi dinnε, mmɔn sɔ, né asoo pì kaarańnε. N de wéε tām̄ma kɔn flàomε, m̀de flà lèdeen né wéε tãom̄ma.

<sup>12</sup> À gurɔ aagɔdee zī Yeroboamu kɔn Isarailinɔ εara wà mò wà Reoboamu lè n pínɡi, lán à òńnε nà à bè, aɔ εara wà mó gurɔ aagɔ gbεra.

<sup>13</sup> Ben kína g̀i gbēnsinɔ lédammazi à yā wèńla pāsīpāsī.

<sup>14</sup> À t̀e gɔkpārenɔ lédammazi à bè: Aso tìisin ma dee diare, mamɔma sɔ mé asoo pì kaaraaremε. Flàn ma de wéε tãoawa, mapi sɔ, flà lèdeen mé wéε tãoawa.

<sup>15</sup> Ben kína g̀i Isarailinɔ yā mazi, zaake yā pì bò Dii kiiamε, le yā kè à ò Nebati né Yeroboamunε annabi Ahia, Silo gbē gāzī e à ke yānzi.



16 Kè Isarailinᵒ è kína gí n̄ yā mazi, aᵗ bène:

Wa bà kú kᵗn Daudaoro,

wa lé kú Yεε né yānlo.

Isarailinᵒ, a baade tá a be!

Dauda bori, ñ n zīnda be kū!

Ben Isarailinᵒ tà n̄ be.

17 Isaraili kè aᵗ kú Yuda boriinᵒ wéte guunᵒn Reoboamu gᵗ n̄ kína ū ado.

18 Kí Reoboamu a zᵗzī gbēnsi Adoniramu zī Isarailinᵒa, ben aᵗ à pàpa gbèo wà à dè. Ben kí Reoboamu fεε kᵗn wāaao à s̄i a sᵗgoron à bàa s̄i à tà Yerusalemu.

19 Len Isarailinᵒ gí Dauda boriinᵒzi le ai kᵗn a gbāao.

20 Kè Isarailinᵒ mà n̄ píngi kè Yeroboamu sù, ben aᵗ à s̄isi kakᵗana guu, ben aᵗ à kà Isaraili boriinᵒ kína ū. Isaraili bori kee e ze kᵗn Dauda boriinᵒ d̄oro, tó èe ke Yuda boriinᵒ baasiro.

21 Kè Reoboamu kà Yerusalemu, à Yudanᵒ kàkᵗa n̄ píngi kᵗn Beyāmi boriinᵒ. Z̄ikari pinᵒ gᵗᵗn bᵗᵗo bakēndome. Ben aᵗᵗe gaa zī ká kᵗn Isarailinᵒ, le wà e wà Sulemanu né Reoboamu kpata sínε wà kpáa d̄o.

22 Ben Luda yā sù Luda gbē kè wè be Semayaa à bè:

23 Ñ o Yudanᵒ kí Sulemanu né Reoboamunε kᵗn Yudanᵒ n̄ píngi kᵗn Beyāmi boriinᵒ kᵗn gbē kpaanᵒ,

24 mamᵒma Dii ma bè, àton gá zī ká kᵗn a Isaraili daanᵒoro. A baade tá a be, zaake yā kè kè pì b̄o ma kiiame. Ben aᵗ yā kè Dii ónne mà aᵗ tà.

25 Yeroboamu Sɛkɛmu kɛ kú ɛflaimu gu kpiideen b̄i b̄ò, ben à v̄ɛɛn. Zaa gwen à ḡaa à Pɛniɛli k̄ɛkɛ à k̄àɛ.

26 Ben à laasuu l̄ɛ à bè: Weé ɛara w̄à Dauda borii s̄ɔkpa kpatammɛ fá!

27 Tó Isarailin̄ɔ e gaa saa o Dii ua Yerusalemu, āɛ ɛara w̄à zɛ k̄ɔn n̄ dii Yudan̄ɔ kí Reoboamuomɛ, āɛ ma dɛ w̄à zɛo.

28 K̄ɛ k̄ina ȳa p̄i gw̄à, ben à vura z̄ùswarɛɛ b̄òr̄ɔn̄ɔ p̄i m̄ɛn plaa, ben à bè gb̄ɛn̄ɔnɛ: Isarailin̄ɔ, a gana Yerusalemu mò lɛ. A dii k̄ɛ āɛ a b̄ɔɛ Igipitin̄ɔn ȳè!

29 Ben à à doo diɛ Bɛteli, à doo s̄ɔ ai Dani.

30 Ben ȳa p̄i ḡɔ́n̄ɛ durun ũ, āɛ gá d̄ɔnzi kɛ à doonɛ Bɛteli, à doo s̄ɔ ai Dani.

31 Yeroboamu kp̄ɛ b̄ò z̄ù p̄in̄ɔnɛ t̄aagb̄āgb̄ākiiin̄ɔa, ben à gb̄ɛ diɛ sa'orin̄ɔ ũ, baa k̄ɔn gb̄ɛ k̄ɛ āɔɔ dɛ Levi borii ũroon̄ɔ.

32 Ben à m̄ɔ s̄ɔraaḡɔde gur̄ɔ ḡɛrodee diɛ z̄ĩbaa ũ lán Yudan̄ɔ p̄ɔ bà se, ben à saa ò t̄aagb̄āgb̄ākii k̄ɛ kú Bɛteli p̄ia. À saa ò z̄ùswarɛɛ k̄ɛ à p̄i p̄in̄ɔa, ben à sa'orin̄ɔ diɛ gwe.

33 Ben à saa ò sa'okii k̄ɛ à k̄ɛ Bɛteli p̄ia m̄ɔ s̄ɔraaḡɔde gur̄ɔ ḡɛrodee z̄ĩ. Gur̄ɔ p̄in̄ɔ à diɛ a z̄ĩnda p̄ɔyɛzia z̄ĩbaa ũ Isarailin̄ɔnɛ.

## 13

### *Luda gb̄ɛ lékɛna Bɛteli sa'okiine*

1 Luda gb̄ɛkɛ b̄ò Yudan̄ɔ bùsun à mò Bɛteli lán Dii d̄ànɛ n̄à gur̄ɔ k̄ɛ Yeroboamu zɛna sa'okii p̄i saɛ lɛ à saa o.

2 Ben à sa'okii p̄i k̄à à bè: Sa'oki, sa'oki, Dii bè weé né i Dauda bɛ, weé tó kp̄ánɛ Yosia. Àpi bé eé saa

omma kōn tāagbāgbākii sa'ori kè aōe zīi kee kèno, eé gbēntee wāno kpátamma.

<sup>3</sup> Gwe gōo Luda gbē pì yā pì kena sèeda ònne à bè: Sèeda kè Dii òn yè. Sa'okii pì é parakōre à túbu é kwéé.

<sup>4</sup> Kè kí Yeroboamu lé kè Luda gbē pì kè Beteli sa'okii pìne mà, ben à òdōa zaa sa'okiia gwe à bè: À à kū! Ben o kè à dōa pì gbāgbā, eé fō à kòko dōro.

<sup>5</sup> Ben sa'okii pì parakōre à túbu kwéé lán Dii dà Luda gbē pìne à ò nà.

<sup>6</sup> Ben kína bè Luda gbē pìne: Ñ agbaa kpáme Dii n Ludane. Ñ wéé keame le ma o e à su a gbèn. Ben Luda gbē pì agbaa kpà Diine, ben à o sù a gbèn lán a zii bà.

<sup>7</sup> Ben kína bè Luda gbē pìne: Ñ mó wà gá ma be wà pò ble, mé gba danne.

<sup>8</sup> Ben à bè kína pìne: Baa tó n n auziki kpadoo kpàma, mé gányoro. Mé pò ble ke mà í mi guu kèro,

<sup>9</sup> zaake Dii bème màton pò ble kèro, màton í mi kèro, màton sō tá kōn zé kè ma mōoro.

<sup>10</sup> Ben à zé pānde sè, èe zé kè à mōo Beteli sé dōro.

<sup>11</sup> Annabi zi kee kú Beteli gwe. Kè à néno sù, aō yā kè Luda gbē pì kè gwe zī beea tōkè n denne kōn yā kè à ò kínaneo píngi.

<sup>12</sup> Ben aō de n lá à bè: Zé kpareen à sè? Ben à néno zé kè Luda gbē kè bō Yudano bùsun pì sè gōgōne.

<sup>13</sup> Ben à bènéne: À gàari yime zaakine. Ben aōo yìne aō à dì à kpéé.

<sup>14</sup> Kè à pèe Luda gbē pìzi, ben à à lè vēena gbíí lí gbáru. Ben à à là à bè: Luda gbē kè bō Yudano bùsumn n ū? À wèàla à bè: Mámbee!

15 Ben annabi zii pì bène: Ñ mó wà gá ma be, ñ pò ble.

16 À wèàla à bè: Mé f̄s mà ɛara mà tányoro. Mé f̄s mà pò ble ke mà í minyo guu kèro,

17 zaake Dii bème màton pò ble ke mà í mi kèro, màton s̄s tá k̄n zé kè ma m̄ooro.

18 Ben annabi zii pì bène: Annabin ma ū lán n bà. Malaika ke bé à Dii yā òme à bè mà péenzi mà sunyo ma be, le ñ pò ble ñ í mi. M̄de eḡeen annabi pì e too.

19 Ben Luda gb̄e pì èarao, à pò blè à be à í mi.

20 Gur̄o kè āo v̄ena pòbleezi, Dii yā sù annabi zii kè sùo p̄ia,

21 ben à wii lè Luda gb̄e kè b̄o Yudan̄o b̄usun p̄ia à bè: Dii n Luda bè, lán n gi a yā mazi nà, n̄e yā kè à ònne maro,

22 n ɛara n m̄o n pò blè n í mi guu kè à ònne ñton pò blenlo ñton í minlo pì, weé n v̄i k̄n n dezin̄oro.

23 À pòblena k̄n à íminao gbera, annabi kè sùo pì gàari ȳine zaakia.

24 Kè à dà zén, ben à kpàkū k̄n m̄usuo, m̄usu pì à dè. À gè ḡò diena zén, ben zaaki k̄n m̄usuo ḡò zena à gè p̄izi.

25 Kè gb̄e kè āo e ḡēeneo à gè è daena zén gwe k̄n m̄usu kè zezio, ben āo gàa wà à baaru kpà wéte kè annabi zii pì kún guu.

26 Kè annabi kè sùo pì à baaru mà, à bè: Luda gb̄e kè ḡi Dii yā mazin gwe. Ben Dii à kpà m̄sua, à à è'ek̄re à dè lán Dii òne nà.

27 Ben à bè a n̄en̄e: À gàari yime zaakine. Ben āo ȳine.

28 À dà zén, ben à gàa à à gè lè daena, zaaki k̄n

músuo zezì. Músu pì e gè pì sóro bensõ èe zaaki pì é'ekõrero.

<sup>29</sup> Ben annabi pì Luda gbẽ pì gè sè à dì zaaki musu à sùo a be wétèn, le à gè só dõ à à v̄i.

<sup>30</sup> Ben à à v̄i a zĩnda miraween, à só dõ à bè: Waiyoo ma gbẽ!

<sup>31</sup> Kè à à v̄i à yàa, à bè a nénɔnɛ: Tó ma ga, à ma v̄i mirawee kè ma Luda gbẽ pì v̄iin à wa gè kpákõzi.

<sup>32</sup> Zaake yã kè Dii dànɛ à ò Beteli sa'okii musu kɔn tãakpe kè kú Samaria b̄usu wéte tãagbãgbãkiiianɔ é ke yãpura.

<sup>33</sup> Baa kɔn beeeo Yeroboamu e kpe li a yãzaakenanero, à èara à Isaraili bori píngi diè tãagbãgbãki sa'orinɔ ù dõ. Gbẽ kè aõ yezì wà gõ tãagbãgbãki sa'orinɔ ùun à ñ ké à ù.

<sup>34</sup> Durun kè tò wà Yeroboamu boriinɔ dúgu z̄õ aõ yàa anduna guun gwe.

## 14

### *Annabi Ahia yã kè eé Yeroboamu lee ona*

<sup>1</sup> Guro beeeo gyãa Yeroboamu négõgbẽ Abia kù.

<sup>2</sup> Ben Yeroboamu bè a naõnɛ: Ñ fɛɛ ñ n zĩnda lie, le wàton n dõ ma nɔ ùro, ñ gá Silo. Annabi Ahia kú gwe. Àmbe à bèmɛ mégõ de Isarailinɔ kina ù.

<sup>3</sup> Ñ burɛdi sé mèn kuri kɔn kàranɔ kɔn zó tùuo, ñ gáonɛ. Eé yã kè eé né pì lee onnɛ.

<sup>4</sup> Ben Yeroboamu naõ kè le, à fɛɛ à gàa Silo à gè Ahia be. Ahia wéɛ e guu e doro, zaake à zi kù à wéɛ gò dãadãa.

<sup>5</sup> Dii gĩake à ò Ahiane kè Yeroboamu naõ né e gyãa keε, ben èe mɔɔ ɛ à yã gbekamma. Ñ one la, ñ one la, zaake tó à mò, eé a zĩnda lienne gbẽ pãnde ùme.

<sup>6</sup> Kè Ahia à kèse kĩi mà, èe gẽε kpén, à bè: Ñ gẽ Yeroboamu naõ! Bóyãnzin n n zĩnda liè ɛzi? Yã pãsin Luda bè mà onne.

<sup>7</sup> Ñ gá ñ o Yeroboamune, Dii Isarailinɔ Luda bè, àmbe a n se n gbẽno té, a n ke a gbẽ Isarailinɔ dɔn'aedee ũ.

<sup>8</sup> A kpata bò Dauda boriinɔ ɔzĩ, ben a n kpan, mɔde ñ de lán à zòbleri Dauda bàro, kè à a yãdienanɔ kũna, à tézi kɔn nòseɔ do à yã kè á yezi kè.

<sup>9</sup> N yã zaaa kè de gbẽ kè aõ dònne aenɔla, n gaa n tãanɔ kè n zĩdane, mò kè ñ kàsa pìnɔ, ben n kpεε liare, n a pɔɔ fè.

<sup>10</sup> Beee yãnzin é mónzi kpá n boriinɔzizi, é n gɔgbẽno kaate Isarailinɔ guu zòno kɔn wẽeneno ñ pínɡi, é té sɔ n beea, lán wè té sɔ zùgbɔa nà ai à té kũ à yãa pínɡi.

<sup>11</sup> Gbẽeno é n borii kè aǎé gaga wétɛno só, bãano é n gbẽ kè aǎé gaga sɛnno ble. Dii bé à ò ɛ.

<sup>12</sup> Mmɔn sɔ nɔgbẽ, ñ fεε ñ tá be. Tó n kèse pèe wéte guu gɔɔ, né pì é ga.

<sup>13</sup> Isarailinɔ é à gè ɔɔ dɔ wà à v̄i. Yeroboamu boriinɔ té ñ pínɡi, àmbe weé v̄i ado, zaake àmbe ado kè Dii Isarailinɔ Luda yã maaa èa Yeroboamu ua.

<sup>14</sup> Dii é kína pãnde die a gbẽ Isarailinɔne. Àmbe eé Yeroboamu boriinɔ dεde. Gbãa kèa! Bóɔɔ? Lεme, tiaaεme!

<sup>15</sup> Dii é gò t̄s Isarailinɔa, aǎé ḡs lán kàba kè èe nigãa í guu bà. Eé Isarailinɔ bɔε bùsu maaa kè à kpà

ń dezinƆa kèn à ń fãakƆa Yuflati baa kãa kpa, kè aƆ Asatorɛ lí pèɛɛɛ aƆ Dii pƆƆ fèone yãnzì.

16 Eé IsarailinƆ kpámma durun kè Yeroboamu kè à IsarailinƆ dà à kenan yãnzì.

17 Ben Yeroboamu naƆ fèè èè taa. Kè à kà Tiza, kè à kèɛ zè kpɛɛɛa gƆƆ, ben négƆgbɛ̀ pì gà.

18 Wà à v̄i, ben IsarailinƆ ƆƆ dò ń pínɡi lán Dii ò a zòbleri annabi Ahia gãzì nà.

19 Yeroboamu yã kpaaanƆ kú IsarailinƆ kínanƆ ḡiayãkenanƆ takadan, z̄i kè à kànƆ k̄n à kíkeyãnƆ pínɡi.

20 Yeroboamu kí blè wè baro awɛɛplaamɛ. Kè à gà, ben à né Nadabu vèè à gbèn.

### *YudanƆ kí Reoboamu*

21 Sulemanu né Reoboamun YudanƆ kína ũ. À kí blè a wè baplaa awɛɛdodeemmɛ, ben à kí blè Yerusalemu wè ḡero awɛɛplaa, wéte kè Dii sè Isaraili bori pínɡi wétɛnƆ té ɛ à tó ḡo kúa. À da tón Naama, Am̄ni boriimɛ.

22 YudanƆ yã kè Dii yeziroo kè, aƆ à pƆƆ fè de ń dezinƆa ń pínɡi ń durun kè aƆƆ kè yãnzì.

23 AƆ tãagbãgbãkiinƆ bò ń z̄indane s̄is̄i lez̄i s̄anda pínɡi musu k̄n lí bíta s̄anda pínɡi gbáruo, aƆ gbènƆ k̄n línƆ pèɛɛɛn.

24 Baa se tãagbãgbãki kaaruanƆ kú IsarailinƆ b̄usun ḡgb̄ɛnƆ k̄n n̄gb̄ɛnƆ. Lemɛ IsarailinƆ borii kè Dii pèmm̄an̄nɛnƆ dà zaaanƆ sèè ɛ pínɡi.

25 Kí Reoboamu kíblena wè sƆƆrodee guun Igipiti kí Sisaki mò à ɛè Yerusalemu.

26 À Dii ua auzikinƆ k̄n kíbe pónƆ nàk̄Ɔa à vura s̄engbango kè Sulemanu pìnƆ sèè pínɡi.

27 Ben kí Reoboamu sɛngbango pìno gɛɛ pì kɔn m̀ogot̃o à nà a bɛ dogari dɔn'aɛdeenɔnɛ n̄ ɔzĩ a bɛ kpɛɛɛ.

28 Tó kína e gaa Dii ua, dogari pìno ègɔ sɛngbango pìno kúna. Tó aɔ èara wà sù, aɔè ɛara wà káɛ n̄ kpén.

29 Reoboamu yā kpaaanɔ kɔn yā kè à kènɔ píngi kú Yudanɔ kínanɔ gĩayākɛnanɔ takadan.

30 Reoboamu kɔn Yeroboamuo ègɔ zĩ kaa kɔo gurɔ píngi.

31 Kè Reoboamu gà, wà à mira kpàkɔzi kɔn a dezínɔ pɔo Dauda wéte. À da tón Naama, Amɔni boriimɛ. Ben à né Abia v̄ɛɛ à gbèn.

## 15

### *Yudanɔ kí Abia*

1 Nɛbati né Yeroboamu kíblena wè baro plaasaidɛ guun Abia gò Yudanɔ kína ũ

2 à kí blè Yerusalemu wè aagɔmɛ. À da tón Maaka, Abusalomu boriimɛ.

3 À durun kè a dee kènɔ kè píngi, èe a zĩnda kpá Dii a Ludaa lán a dezi Dauda bàro.

4 M̀de Dauda yānzín Dii à Ludaa tò à bori kí blè Yerusalemu, à à bori pì diè à gɛɛ ũ à tò Yerusalemu gbāaa è.

5 Zaake Dauda yā kè Dii yezi kè, èe gí yā kè Dii dienɛ maziro ai a wèndi lén, tó èe kɛ yā kè à kè Iti bori Urianɛ baasiro.

6 Abia kɔn Yeroboamuo ègɔ zĩ kaa kɔo ai Abia wèndi lén.

7 Abia yā kpaaanɔ kɔn yā kè à kènɔ píngi kú Yudanɔ kínanɔ gĩayākɛnanɔ takadan.



<sup>8</sup> Kè à gà, wà à vī Dauda wéte, ben à né Asa véε à gbèn.

### *Yudanŏ kí Asa*

<sup>9</sup> Isarailinŏ kí Yeroboamu kíblena wè barodee guun Asa gŏ Yudanŏ kína ũ,

<sup>10</sup> ben à kí blè Yerusalemu wè baplaa awεεdo. À dazi tón Maaka, Abusalomu boriime.

<sup>11</sup> Kí Asa yā kè Dii yezi kè lán a dezi Dauda bà.

<sup>12</sup> À pè tāagbāgbāki kaaruanŏa a būsun, ben à tāa kè a dezinŏ kènŏ kwè píngi.

<sup>13</sup> Baa se à a dazi Maaka bò kpatan, kè à Asatore lí gina pèε yānzi. Kí Asa lí pì zŏ à té sŏa Kidironu guzureñ.

<sup>14</sup> À a zīnda kpà Diia ai a wèndi lén, mode èe tāagbāgbākii kè wà bònŏ gbororo.

<sup>15</sup> À vura kŏn kondogio kŏn pó pānde kè api kŏn a deo diε Dii pó ũunŏ sèε à kàε Dii ua.

<sup>16</sup> Asa kŏn Isarailinŏ kí Baasao ègŏ zī kaa kŏo ai ní kíblena gurŏlen.

<sup>17</sup> Baasa bé à gàa à lèε Yudanŏ būsua, ben èe bīi boo à liga Ramazi, le gbēke tón bŏ ke à gē Yudanŏ kí Asa būsunlo yānzi.

<sup>18</sup> Ben Asa kondogi kŏn vura kè gŏ Dii ua làasinŏ sèε kŏn pó kè kú a be làasinŏ, à nà a ìbanŏne ní ɔzī, ben à ní zī Damasiku, Siria būsū kí Benadada, Tabirimŏ né, Eziŏ dio kiia à bè:

<sup>19</sup> Wà ledole ke lán ma de kŏn n deo kè nà yā. À kondogi kŏn vuraon yè. N ledole kè ní vī kŏn Isarailinŏ kí Baasao gboro, le à gumala kŏn a zīkpεenŏ.

<sup>20</sup> Ben Benadada ledole kè kōn Asao à a zìkpreenŋ gbàre aŋ gaa wà lèe Isaraili wétēnŋa. Aŋ Iyona si kōn Danio kōn Abeli Betemakao kōn Genesareti guuo kōn Nafatali boriinŋ guuo dŋ pīngi.

<sup>21</sup> Kè Baasa à baaru mà, ben à bīibona Ramazi tò à tà Tiza.

<sup>22</sup> Ben kí Asa kpàakpa kè Yudanŋe n̄ pīngi, èe gbēke tè boro à bè, aŋ Rama gbènŋ kōn lí kè Baasa e bīi boonŋ sée. Ben à bīi bòo à liga Geba kè kú Beyāmi boriinŋ guuzi kōn Mizipao.

<sup>23</sup> Kí Asa yā kpaaanŋ kú Yudanŋ kīnanŋ gīayākenanŋ takadan, à négōgbēkeyānŋ kōn yā kè à kēnŋ pīngi kōn wéte bīi kè à bōnŋ. Kè à zi kū, gyāa à kú a gbálanŋa.

<sup>24</sup> Kè à gā, wà à mira kpàkōzi kōn a dezinŋ pŋo a dezi Dauda wéte, ben à né Yosafata vèe à gbèn.

### *Isarailinŋ kí Nadabu*

<sup>25</sup> Yudanŋ kí Asa kíblena wè plaadee guun Yeroboamu né Nadabu kè Isarailinŋ kīna ũ à kí blè wè plaame.

<sup>26</sup> À yā kè Dii yeziroo kè kè à zè kōn yā kè a dee kè à Isarailinŋ dà durun guuo.

<sup>27</sup> Ahia né Baasa, Isaka bori lé kpàkōsōzi gurŋ kè àpi kōn Isarailinŋ e ligaa Filisitini wéte Gibetōzi, ben à à dè gwe.

<sup>28</sup> À à dè Yudanŋ kí Asa kíblena wè aagōdee guume, ben à vèe à gbèn.

<sup>29</sup> Kè à nà kíblenaa, ben à Yeroboamu boriinŋ dèdè n̄ pīngi, èe n̄ gbēke tóro, à n̄ káate lán Dii ò a zòbleri Ahia, Silo gbē gāzī nà.

<sup>30</sup> Yā pì kè lε durun kè Yeroboamu kè yānzi, kè à Isarailinŏ dà à kenan à Dii Isarailinŏ Luda pɔɔ fɛ̀onε.

<sup>31</sup> Nadabu yā kpaaanŏ kŏn yā kè à kènŏ píngi kú Isarailinŏ kínanŏ gĩayākenanŏ takadan.

<sup>32</sup> Kí Asa kŏn Isarailinŏ kí Baasao zì kà kŏo ai n kíblena gurɔlemε.

### *Isarailinŏ kí Baasa*

<sup>33</sup> Yudanŏ kí Asa kíblena wè aagŏdee guun Ahia né Baasa kè Isarailinŏ kína ũ. À kí blè Tiza wè baro awεεsiigŏ.

<sup>34</sup> À yā kè Dii yeziroo kè, kè à zè kŏn Yeroboamu yākenao kŏn durun kè à Isarailinŏ dà à kenan-o.

## 16

<sup>1</sup> Dii yā sù Anani né Yehua, ben à yā ò Baasanε à bè:

<sup>2</sup> Ma n bŏ b̀sutin, ma n ke ma gbɛ Isarailinŏ dɔn'aεdee ũ, ben n ze kŏn Yeroboamu yākenanŏ n ma gbɛ Isarailinŏ dà durun guu, ben aŏ durun pìnŏ ma pɔɔ fɛ̀.

<sup>3</sup> Mmɔn kŏn n boriinŏ, mé a dúgu zŏmε sa. Mé ke n uanε lán má kè Nεbati né Yeroboamu uanε nà.

<sup>4</sup> Gbɛenŏ é n gbɛ kè aŏé gaga wéte guunŏ só, bāanŏ é n gbɛ kè aŏé gaga sɛnnŏ ble.

<sup>5</sup> Baasa yā kpaaanŏ, yā kè à kènŏ kŏn à négŏgbɛkeyānŏ kú Isarailinŏ kínanŏ gĩayākenanŏ takadan.

<sup>6</sup> Kè Baasa gà, wà à v̄i Tiza, ben à né Ela v̄εε à gbèn.

<sup>7</sup> Dii yā pì ò Baasanε kŏn a boriinŏ annabi Yehu, Anani né gāzĩ, yā zaaa kè à kè à Dii pɔɔ fɛ̀onε lán

Yeroboamu boriinɔ kɛ̀ nà yānzi kɔ̃n Yeroboamu borii kɛ̀ à ń kaatenɔ yāo dɔ.

### *Isarailinɔ kí Ela*

<sup>8</sup> Yudanɔ kí Asa kíblena wɛ̀ baaasɔɔro awɛɛdodee guun Baasa né Ela kɛ̀ Isarailinɔ kína ũ à vɛ̀ɛ Tiza wɛ̀ plaa.

<sup>9</sup> À ìbanɔ do Zimirin à sɔgoronɔ kpadoo gbɛ̃nsi ũ, ben à lé kpàkɔ̃sɔ̃zińyo. Gurɔ kɛ̀ í Ela kù a bɛgwari Aza kpén zaa Tiza,

<sup>10</sup> ben Zimiri gɛ̀ à à dè Asa kíblena wɛ̀ baaasɔɔro awɛɛplaadee guu, ben à vɛ̀ɛ à gbèn.

<sup>11</sup> Kɛ̀ à kí blè gɔ̃ɔ, ben à Baasa boriinɔ dèdɛ ń pínɡi, èe gɔ̃gbɛ̀ ke tó à danenɔ ke à gbɛ̃nnanɔ téro.

<sup>12</sup> À Baasa borii pìnɔ kàate ń pínɡime, lán Dii ò annabi Yehu gāzī nà.

<sup>13</sup> Baasa kɔ̃n a né Elao Dii Isarailinɔ Luda pɔɔ fɛ̀nɛ durun kɛ̀ aɔɔ kɛ̀ taa pāpāanɔ yā musu, ben dɔ aɔ Isarailinɔ dà à kenan yānzi.

<sup>14</sup> Ela yā kpaaanɔ kɔ̃n yā kɛ̀ à kènɔ pínɡi kú Isarailinɔ kínanɔ gāyākenanɔ takadan.

### *Isarailinɔ kí Zimiri*

<sup>15</sup> Yudanɔ kí Asa kíblena wɛ̀ baaasɔɔro awɛɛplaadee guun Zimiri kí blè Tiza gurɔ swɛɛplaa. Gurɔ beea Isaraili zìkpɛ̃enɔ bùra kú Filisitini wéte Gibetɔ saɛ.

<sup>16</sup> Kɛ̀ zìkpɛ̃ɛ pìnɔɔ mà Zimiri lé kpàkɔ̃sɔ̃ kɔ̃n gbɛ̃nɔ kínazi à à dè, ben aɔ ń dɔn'aede ɔmiri kà Isarailinɔ kína ũ ń bùran gwe gɔ̃ɔ.

<sup>17</sup> Ben ɔmiri kɔ̃n Isaraili zìkpɛ̃enɔ fɛ̀ɛ Gibetɔ aɔ gàa wà līga Tizazi.

18 Kè Zimiri è aõ a wéte siawa, ben à didi à gè a be kpédidikōana musun à té s̄sa, ben à té kù, à gà

19 durun kè à kè yānzi. À yā kè Dii yeziroo kè kè à zè kōn Yeroboamu yākenao. À durun kè, ben dō à Isarailinō dà à kenan.

20 Zimiri yā kpaaanō kōn lé kè à kpàkōsōnyo Elazio kú Isarailinō kīnanō gīayākenanō takadan.

### *Isarailinō kī Ōmiri*

21 Isarailinō kpàate leo plaa. Aõ kpadoonō yezì wà Ginati né Tibini ká kī ũ, n̄ kpadoonō s̄s̄ Ōmiri.

22 Kè gbē kè aõ zè kōn Ōmirionō gbāaa dè gbē kè aõ zè kōn Ginati né Tibinionōla, ben wà Tibini dè, Ōmiri kī blè.

23 Yudanō kī Asa kīblena wè baaakuri awεedodee guun Ōmiri kè Isarailinō kīna ũ, à kī blè wè kuri awεεplaa. À kè Tiza wè swεedo,

24 ben à Samaria s̄s̄i lù Sema kōn kondogio kiloo baaagō akuri, ben à wéte kàea à tó kpàne Samaria kè Sema bé à s̄s̄i pì vī yā yānzi.

25 Ōmiri yā kè Dii yeziroo kè à durun kè de gbē kè aõ dōne aenō p̄la n̄ píngi.

26 À zè kōn Nebati né Yeroboamu yākenao píngi. À Dii Isarailinō Luda p̄ō f̄ēne kōn durun kè à kè t̄aa p̄āp̄ānō yā musuo à Isarailinō dà à kenan dō.

27 Ōmiri yā kpaaanō kōn yā kè à kènō kōn à négōgbēkeyānō kú Isarailinō kīnanō gīayākenanō takadan.

28 Kè à gà, wà à v̄i Samaria, ben à né Ahabu v̄ēē à gbèn.

### *Isarailinō kī Ahabu*

29 Yudanŋ kí Asa kíblena wě̃ baplaa plaasaidee guun Ōmiri né Ahabu kè Isarailinŋ kína ũ à kí blè Samaria wě̃ baro awεεplaame.

30 À yā kè Dii yeziroo kè de gbē kè aō dōne aenŋ pōla ń pínɡi.

31 À zena kōn Nebati né Yeroboamu durunkenao e kenε yāke ũro, ben à Sidōdeenŋ kí Etabaali nénŋgbē Yezebeli sè nŋŋ ũ, ben à nà Baali tāagbāgbānaa, ègō kuεεne.

32 À kpé bō Baaline Samaria, ben à à gbāgbākii pèε kpé pì guu.

33 À Asera lí pèen dŋ à èara à Dii Isarailinŋ Luda pŋŋ fēne de Isarailinŋ kína kè aō dōne aenŋ pōla ń pínɡi.

34 Ahabu gurŋŋan Beteli gbē Iyeli Yeriko kèke à kàε. Kè à à bīi ēε dàε, ben à négōgbē káaku Abiramu gà. Kè à à zé gbàŋŋ pèε, ben à né zāade Segubu gà lán Dii ò Nuni né Yŋsua gāzī nà.

## 17

### *Gbáa kánkānanŋ annabi Ilia gwana*

1 Tisibe gbē Ilia bō a be Giliada būsun à gāa à Ahabu lè à bè: Kōn Dii Isarailinŋ Luda kè méε dŋŋzi kuunao, zaa wě̃ kèa kpíi é kpáro, lou é maro, séde gurŋŋ kè má ò baasiro.

2 Ben Dii yā sù Iliaa à bè:

3 N̄ fεε n̄ gá ofāntēbŋε kpa, n̄ ute Keriti swawεen Yoda baa kāa kpa.

4 Néɡō swaa pì í mii. Má diε gbáa kánkānanŋne aōgō n gwaa gwe.

5 Ben à gāa à kè lán Dii òne nà, à vèε Ke riti swawεen Yoda baa kāa kpa.

6 Gbáa kánkānanŏ ègŏ mŏŏne kŏn burɛdio kŏn nŏbŏŏ kŏngŏ kŏn uusieŏ, ben ègŏ swaa pì í mi.

*Zarɛfa gyaanŏ Ilia gwana*

7 Gurŏ plaaa gbɛra swaa pì í bàba kè lou e ma bùsu pìnlo yānzi.

8 Ben Dii yā sùà à bè:

9 Ñ fɛɛ ñ gá Zarɛfa Sidŏ bùsun, ñgŏ kú gwe. Ma gyaanŏ ke diɛ àgŏ n gwaa gwe.

10 Ben à fɛɛ èe gaa Zarɛfa. Kè à kà wétɛ pì saɛ, à gyaanŏ ke lè, èe yàka wɛɛ gwe. Ben Ilia lé zù gyaanŏ pìzi à bè: Ñ gá mómɛ kŏn ío, baa féte, mà mi.

11 Kè èe gaa tó, Ilia èara à lé zùzi à bè: Ñ mómɛ kŏn burɛdi kusuo dŏ.

12 Ben nŏgbɛ pì bène: Kŏn Dii n Luda kuunao, baa burɛdi má vīro, séde wísiti okū doo kè gŏ gbaka guu kŏn nŏsio féte tùu guu baasiro. À yàkan méɛ wɛɛ kè, lɛ mà tá be mà pŏblee keŏ, wà ble kŏn ma néo wàgŏ ga dāa.

13 Ben Ilia bène: Ñton tó vīa n kūro. Ñ gá ke lán í ò nà, mŏde ñ burɛdi keŏ féte ñ mŏome gīa, né gbasa ñ n pŏ ke kŏn n néo.

14 Zaake Dii Isarailinŏ Luda bè, wísiti gbaka pì égŏ da koriro, bensŏ nŏsi é yāa tùu pìnlo ai gurŏ kè éé tó lou ma bùsu pìn.

15 Gyaanŏ pì gāa à kè lán Ilia òne nà, ben pŏblee mŏmɛma ai gurŏ ũgbangba, àpi kŏn a bɛdeenŏ kŏn Iliao.

16 Wísiti e yāa gbaka pìnlo, bensŏ nŏsi e yāa tùu pìnlo, lán Dii ò Ilia gāzī nà.

17 Beeɛ gbɛra nŏgbɛ bɛdee pì né e gyāa keɛ. Kè gyāa gbāaa kpà maamaa, ben à wèndi bŏ.

18 Ben nɔgbɛ̀ pì bè Ilianɛ: Luda gbɛ̀, b́ b́ è à wa ka kè n mɔmazi? N mɔ ma durun dɔ Ludan lè à ma né dɛ yānzin yó?

19 Ben Ilia bènɛ: N n né pì kpáma. Ben à né pì sì nɔgbɛ̀ pì ɔzì à didio kpé musu guu kè à pítan. À à dàɛ a gádoa gwe,

20 ben à wii pè Diizi à bè: Dii ma Luda, mbe ní tò gyaanɔ̀ kè ma pita à bɛ né gà n pɔsɔiaa kpàzìó?

21 Ben à dàɛ à a zīnda pòro nɛgɔ̀gbɛ̀ pìla gèn aagɔ̀ à wii pè Diizi à bè: Dii ma Luda, n tó à wèndi ɛara à su à mè guu.

22 Dii Ilia wiipɛna mà, ben wèndi ɛara à sù né pì à fɛɛ.

23 Kè Ilia nɛgɔ̀gbɛ̀ pì sè à pìtao, à gèo kpén, ben à à kpà à daa à bè: N gwa, n né pì wèndi sù!

24 Ben nɔgbɛ̀ pì bè Ilianɛ: Má d̄ sa kè Luda gbɛ̀n n ũ. Dii yā kè bò n lén né yāpuraame.

## 18

### *Ilia k̄n Obadiao*

1 À gurɔ̀ plaaa kè, ben Dii yā sù Iliaa lousaiwɛ̀ aagɔ̀dee guu à bè: N gá n n zīnda ɔdɔa Ahabunɛ, mé tó lou ma à b̀sun.

2 Ben Ilia fɛɛ èe gaa a zīnda ɔdɔa Ahabunɛ.

Kè dekaa gbāaa kpà Samaria,

3 ben Ahabu a bɛgwari Obadia s̄isi. Obadia pì s̄ɔ̀ Dii v̄ia v̄i maamaa.

4 Kè Yɛzɛbɛli e Dii annabinɔ̀ dɛdɛ yā, ben Obadia ní gbɛ̀ kenɔ̀ s̄ɛɛ ḡɔ̀n basɔ̀ro à ní úte gbèwɛɛnɔ̀ guu ḡɔ̀n baplaa akurikuri, ben à ní gwá k̄n p̄bleeo k̄n ío.



<sup>5</sup> Ben Ahabu bè Obadiane: Wà dɔdɔ guuzi wà gá íbɔkiinɔ kɔn swawεεnɔn píngi. Wègɔ dɔro ke wé sè e wà kpá wa sɔnɔa kɔn wa báagāsɔnɔ.

<sup>6</sup> Ben aɔ guu kpàate, aɔ baade a zé sè.

<sup>7</sup> Kè Obadia tɛna, ben aɔ kpàkɔa kɔn Iliao. À à dɔ, ben à dàe a puua à bè: Ma dii Ilia, míbe gweɔ?

<sup>8</sup> Ilia wèàla à bè: Mámbee! N̄ gá o n diine má kú kè.

<sup>9</sup> Ben Obadia bè: Bó taarin má kè, kè née mamɔma n zɔbleri naa Ahabune a ɔzĩ à ma dɛɛ?

<sup>10</sup> Má sì kɔn Dii n Ludao bori ke bùsu kee kuu kè ma dii gí gbɛnɔ zĩm̄ma wà n wetenziro. Tó wà bè n̄ kú gwero, è tó aɔ ladame.

<sup>11</sup> Ben née oome dɔ mà gá mà o ma dii Ahabune kè n̄ kú kèɔ?

<sup>12</sup> Tó ma da zén, mégɔ dɔ guu kè Dii Nini é n sé à tányoro. Tó ma gaa má ò Ahabune, tó à mò èe n ero, eé ma demε. Mamɔma n zɔbleri sɔ má Dii v̄ia v̄i zaa ma òwazikεgurɔmε.

<sup>13</sup> Ma dii Ilia, kè Yezɛbeli e Dii annabinɔ dɛdɛε, née yã kè má kè maroo? Mámbe ma n̄ gbɛkenɔ sèε gɔɔn basɔro, ma n̄ úte gbèwεεnɔ guu gɔɔn baplaa akurikuri, ma n̄ gwá kɔn pɔbleeo kɔn ío.

<sup>14</sup> Ben n bèmε dɔ mà gá mà o ma dii Ahabune n̄ kú kèɔ? Eé ma dɛε.

<sup>15</sup> Ben Ilia bè: Má sì kɔn Dii Zìkpade kè mée dɔɔzio, mé ma zĩnda ɔɔbane gbàa sa.

*Ilia kɔn Baali taagbagbarinɔ Kameli kpii musu*

<sup>16</sup> Ben Obadia gaa à dà Ahabule à yã pì òne, ben Ahabu gaa da Iliale.

<sup>17</sup> Kè Ahabu Ilia è, à bène: Isarailinɔ bùsu dèri, míbe gweɔ?

18 Ben Ilia bè: Èe ke mámbe ma IsarailinƆ bùsu dèro, m̀be k̄n n de bēdeenƆ ámbé á dè, zaake a p̄a kpà Dii yādiēnanƆzi a dɔ Baalizi.

19 N̄ IsarailinƆ sísi n̄ p̄ingi, wà dak̄re Kameli kp̄iii musu lēdo k̄n Baali t̄āgbāgbāri ḡɔn wàa plaa kpé baplaa akuri k̄n Asera t̄āade ḡɔn wàa plaaa kè āè p̄o ble k̄n YezebelionƆ.

20 Ahabu IsarailinƆ sísi n̄ p̄ingi, ben à t̄āadee p̄inƆ kàk̄sa Kameli kp̄iii musu.

21 Ben Ilia s̄ò gbēnƆzi à n̄ lá à bè: A laasuu éḡɔ kpaatena ai b̄oreme? Tó Dii né Ludame, à tézi. Tó Baalime s̄o, à tézi. Āɔe yāke siàlaro,

22 ben Ilia bènn̄e: Dii annabinƆ té mámbe ma ḡɔ mado. Baali t̄āgbāgbārinƆ s̄o, ḡɔn wàa plaa kpé baplaa akurime.

23 À z̄uswareenƆ kpáwa mèn plaa, t̄āadee p̄inƆ à mèn doo sé ā z̄z̄z̄k̄re wà ká yākala, āton té naaro. Mam̄ma s̄o, mé à doo keke mà ká yākala, mé té naa sero.

24 Ām̄onn̄o é Baali sísi, mam̄ma s̄o mé Dii sísi. Ā gbē kè mà, ben à sù téo, àmbé Luda ũ. Ben baade p̄ingi bè: Yā maaame!

25 Ben Ilia bè t̄āadee p̄inn̄e: À z̄usware mèn doo sé à keke káaku, zaake ámbé á pari. À a t̄āa sísi, m̄ode àton té naaro.

26 Ben ā z̄uswaree kè wà kp̄ám̄ma si ā kèkè, ben āɔe Baali sisii zaa k̄ngƆ ai ɔf̄ántē ḡaa káo m̄idangura. Āɔe ã w̄aa, āɔe ligaa sa'okii kè wà b̄ozi, āɔe bee: Baali, né yā mawaroo? Baa k̄n beeeo āɔe yāke maro, èe yā mar̄maro.

27 Kè ɔf̄ántē kà m̄idangura, ben Ilia e n̄ lalandi kee à bè: À wii lé gb̄aa à kaara, à de diime gw̄e! Ke à

laasuu tà gu pāndeame. Ke à gàa bīikpɛɛ keme. Ke à gàa wéteame. Ke èè ii oome, ben ée à vuroo?

<sup>28</sup> Ben aōɔe wii lɛɛ kōn kòto gbāāao, aōɔe n̄ zīnda lilii kōn fēdaao kōn sário lán aō kō dōo nà, ai aru e plaa n̄ mèa.

<sup>29</sup> Kè ɔfāntē gò mìa, ben aōɔe yā yaa ai sa uusie ogurɔɔ gàa à kào. Baa kōn beeeo èè yāke sílɛro, èè yā mammaro, èè swā kpánziro.

<sup>30</sup> Ben Iliá bè pariine: À sōmazi kè! Kè aō sōzi n̄ píngi, ben à Dii gbāgbākii kè gbòro kèkè èè boo.

<sup>31</sup> À gbè sèse mèn kuri awɛɛplaa Yakubu boriino pari lén. Yakubun Dii yā òne yā à bè wàgae bene sa Ísaraili.

<sup>32</sup> Kè à Dii gbāgbākii pì bò, ben à wèe yò à lìgazi. Wèe pì kà à í sí lita gēro.

<sup>33</sup> À yàka kà sa'okii pìla, à zù pì zòzòkòre à kà yàka pìà à bè: À í tó lo siigō, é ká sa'opɔ pìà kōn yàka pìo.

<sup>34</sup> Kè aō tò, ben à bè: À ɛara à tó dɔ. Kè aō tò, ben à bè: À ɛara à tó à ke gèn aagō. Ben aō tò ai gèn aagō.

<sup>35</sup> Í pì bàà lè à lìga sa'okii pìzi ai wèe pì pà.

<sup>36</sup> Sa uusie ogurɔ ben annabi Iliá sōzi à bè: Dii, Ibraĩ kōn Isaakuo kōn Isarailio Luda, n̄ tó wà dō gbàa kè mbe Isarailino Luda ũ bensō n̄ zòblerin ma ũ, mée yā kè kee kè mbe n̄ ma dan yānzi.

<sup>37</sup> N̄ yā mama Dii! N̄ yā mama, lɛ gbē kènɔ e wà dō kè Dii, mbe n̄ Luda ũ bensō n̄é n̄ nòse liéne lɛ aō ɛara wà summa.

<sup>38</sup> Ben Dii té sù sa'obɔ pìà kōn yàkao kōn gbèno kōn bùsuo, aō té kù, ben í kè kú wèe pìn bàba.

<sup>39</sup> Kè gbēno è, ben aō dàe n̄ puua wà bè: Diime Luda ũ! Diime Luda ũ!

<sup>40</sup> Ben Ilia dànnε à bè: À Baali tāagbāgbāri pìno kūkū, aṣ gbēke tón pitiaguro. Kè wà n kūkū, ben Ilia gaańyo Kisō guzuren à n dεdε gwe.

<sup>41</sup> Ilia bè Ahabunε: N gá pó ble n í mi, zaake ma lou kīi mà dɔ.

<sup>42</sup> Ben Ahabu gaa pó ble à í mi. Ben Ilia dīdi à gaa Kameli mìsōntēa à v̄εε à mì kà tú.

<sup>43</sup> À bè a zīkerinε: N gá guu gwa ísīaa kpa. Ben à gaa à gwà. Kè à sù à bè: Pókee kú gwero. Ben Ilia bène à εara à gá gwa dɔ, ben à gaa le ai gèn swεεplaa.

<sup>44</sup> À gèn swεεpladeeo zīkeri pì bè: Ma lou sèda è sεtεεε lán ɔla bà, èe fεεε ísīaala. Ben Ilia bène: N gá n o Ahabunε à sōgoro dɔ sōnoa à gèn à pita kpīīia ai lou gō gá à dādā.

<sup>45</sup> Lou e sisii busebuse, zāga'īa fεε, ben lou mà maamaa. Ahabu kú sōgoron, èe taa Yεzerili.

<sup>46</sup> Dii gbāaa mò Ilīaa, ben à a utadaa kākakōa à kù, à bàa lè à Ahabu kè ai à gaa káo Yεzerili.

## 19

### *Dii yā'ona Ilīao Orεbu*

<sup>1</sup> Ben Ahabu yā kè Ilīa kè tōkè Yεzεbelinε píngi, lán à tāadee pìno dèdε nà kōn fεεdaao n píngi.

<sup>2</sup> Ben Yεzεbeli lékpāsā kè Ilīanε à bè: Ai zia mōndaa'i, tó mée kennε lán n kè tāadeenone nàro, tāano yā kemε pāsīpāsī!

<sup>3</sup> Ben vīa Ilīa kù, ben à fεε à bàa sī à a zīnda mībókii wète. Kè à kà Bεseba, Yudanɔ bùsun, gwen à a zīkeri tòn,

<sup>4</sup> ben à táa ò gbáan gurɔ do. À gaa à v̄ēē sē lí gbáru, ben à adua kè à e à ga à bè: Dii, yā kèkii mòmá lē. N̄ ma w̄ēndi sé ḡɔ, zaake má de ma dezinɔlaro.

<sup>5</sup> Ben à dàē èē ii oo sē lí pì gbáru.

Èē gì kero ben malaika mò à ɔ kèa à bè: N̄ fēē n̄ pò ble.

<sup>6</sup> Kè Ilia guu gwà, ben à kàra aasana è k̄ɔn í tùuo kaena a mìzi. Ben à pò blè à í mì à èara à dàē.

<sup>7</sup> Dii Malaika èara à mò à ḡēn plaadeeo, à ɔ kèa à bè: N̄ fēē n̄ pò ble, zaake tá gbàan n̄ēē mɔɔ o.

<sup>8</sup> Ben à f̄ēē à pò blè à í mì. Pòblee pì tò à gbāaa è, ben à táa ò gurɔ baplaa f̄āantē k̄ɔn gwāav̄io ai à gaa à kà Luda kp̄iii kè wè be Orɛbua.

<sup>9</sup> Ben à ḡē gbèwēēn à ì gwe, ben Dii yā s̄ua à bè: Ilia, b̄ón n̄ēē kēē kè?

<sup>10</sup> À wèàla à bè: Dii Luda Z̄ikp̄ede, ma làakari f̄ēē maamaa, zaake Isarailinɔ p̄ā kp̄à n̄ bà kuunañyo yāzi, ben āñ n̄ gbāgbākiinɔ gbòro āñ n̄ annabinɔ d̄èdē k̄ɔn f̄ēēdaao. Mámbe ma ḡɔ mado, ben āñe ma wēē se.

<sup>11</sup> Ben Dii bè: N̄ bɔ n̄ gá zē ma aē kp̄iii musu, mé ḡēte n̄ aē.

Zàga'íā gbāaa f̄ēē, èē kp̄iii p̄inɔ paraa èē gbèno wiwii Dii aē, m̄ode Dii kú íā pì guuro. Íā pì gbera t̄ɔɔte n̄igānigā, m̄ode Dii kú t̄ɔɔte n̄igānigāna pì guuro.

<sup>12</sup> T̄ɔɔte n̄igāna pì gbera ben té b̄ò, m̄ode Dii kú té pì guuro. Té pì gbera ben k̄òto busē b̄ò tēēē.

<sup>13</sup> Kè Ilia k̄òto pì mà, à a utadaa kù a w̄éela. Ben à b̄ò à gaa à zè gbèwēē pì léa, à mà wà bèare: Ilia, b̄ón n̄ēē kēē kè?

14 À wèàla à bè: Dii Luda Zìkpede, ma làakari fèe maamaa, zaake Isarailinɔ pã kpà n bà kuunaíyo yāzi, ben aɔ n gbāgbākiinɔ gbòro aɔ n annabinɔ dèdè kɔn fèdaao. Mámbe ma gɔ mado, ben aɔe ma wɛɛ se.

15 Ben Dii bène: Ñ ɛara ñ tá Damasiku gbáan. Tó n ka gwe, ñ Azaili ká Sirianɔ kína ũ,

16 né Nimisi dio Yehu ká Isarailinɔ kína ũ, né Abeli Meɔla gbě Safata né Elisa ke n gèe ũ annabi ũ.

17 Gbē kè bò Azaili fèdaa lézĩ, Yehu bé eé à dɛ. Tó à bò Yehu fèdaa lézĩ sɔ, Elisa bé eé à dɛ.

18 Baa kɔn beeeo má Isarailinɔ kúna gɔɔn bɔɔ swɛɛplaa, kè aɔ gbēkee e kúe Baaline à lé pèaro.

### *Elisa sisina*

19 Ben Ilia fèe à bò gwe à gàa à Safata né Elisa lè, èe bú wii kɔn zùnɔ swaaro kuri awɛɛplaa. Àmbe à té zù swaaro kpɛɛdeezi. Ben Ilia sòzi à a gyaba gò à dààla.

20 Ben Elisa a zùnɔ tò gwe à bàa lè à bò à té Ilia kpɛɛ, ben à bène: Ñ tó mà gá lé za ma de kɔn ma daoa gĩa, mé gbasa mà mó mà ténzi sa. Ben Ilia bène: Ñ gá ñ ɛara ñ su. Asa n dɔ yā kè má kènnɛ.

21 Ben Elisa ɛara à gàa à a zùnɔ kòto kpà à té lè kɔn a zù swaaro gbóngoo, ben à zù pìnɔ nòbɔ fùfu kè à kpà gbēnɔa aɔ sò. Ben à bò à tè Iliazi, à gò à plaadee ũ.

## 20

### *Benadada kɔn a zìkpɛɛnɔ ligana Samariazi*

1 Siria kí Benadada a zìkpɛɛnɔ kàkɔa n pínɡi. Kí gɔɔn baaakuri awɛɛplaaanɔ kúo kɔn n sɔnɔ kɔn n sɔgoronɔ. Ben aɔ gàa wà lịga Samariazi aɔ lèea.

2 Ben à gbě̀nƆ zì Ahabua wéte guu à bè: Ma Benadada ma bè,

3 n kondogi kōn n vuraƆ gò ma pó ũ. N nƆ maaanƆ kōn n né maaanƆ gò ma pó ũ dƆ.

4 Ben IsarailinƆ kína bè: Ma dii kí, mapi kōn pó kè má vīinƆ gò n pó ũ píngi lán ní ò nà.

5 Ben Benadada èara à gbě̀nƆ zì dƆ à bè: Ma Benadada ma gbě̀nƆ zì ma n kondogi kōn n vuraƆ kōn n nƆnƆ kōn n néƆ lamma.

6 Zia mɔndaa'í mé ma gbě̀nƆ zĩmma aō n beε kpoke kōn n gbě̀nƆ beεnƆ, aōé a pó bèedeennƆ sée wà suome píngi.

7 Ben IsarailinƆ kína a bùsu gbě̀nsinƆ sìsi ní píngi à bè́nne: Á è lán èe ma lé weteεo nàó? Kè à gbě̀nƆ zìma, à ma nƆnƆ kōn ma néƆ kōn ma kondogio kōn ma vuraƆ lãma, mée gionero.

8 Ben gbě̀nsi pìnƆ kōn gbě̀ kpaanƆ bène: Nton à yã maro, nton wenero.

9 Ben à bè Benadada zìrinƆne: À gá à o ma dii kíne, pó kè à là mamoma a zòbleria káakun mé ke. Pó kè à làma zãa kèkiin mé kero. Ben zìri pìnƆ èara wà gàa Benadadaa kōn lékpāsã pìo.

10 Ben à èara à gbě̀nƆ zì Ahabua dƆ à bè: Tó Samaria bùsuti gò à kà kè ma gbě̀nƆ e à kƆkƆ ɔkũ doodo, tãanƆ yã kemε pāsĩpāsĩ!

11 Ben IsarailinƆ kína bè: À gá à onε, gbě̀ kè èe zìka'uta daa tón ãa dã lán gbě̀ kè uta pì bò à kàε bàro.

12 Kè Benadada yã pì mà gurƆƆ kè èe í mii kōn a kína daanƆ ní bisakutaanƆ guu, ben à bè a gbě̀nƆne aō soru ke. Ben aō gàa soru ke.

### *Ahabu zìblena Benadadaa*

13 Annabi ke mò à IsarailinƆ kí Ahabu lè à bène: Dii bè, n zìkpε parii kègweenƆ ès? É n nannε n ɔzì gbàa, négɔ dɔ kè ámbε Dii ũ.

14 Ben Ahabu à là à bè: Dé bé eé beee κεε? À wèàla à bè: Dii bè, n bùsu gu gbēnsinƆ òwazi zìkarinƆ bé wé κε. Ben Ahabu à là dɔ: Dé bé eé na zìl káaku? À wèàla à bè: Mbee!

15 Ben Ahabu gu gbēnsinƆ òwazi zìkari pìnƆ kàkɔa gɔɔn wàa do kpé baaakuri awεεplaa. Ben à a zìkpεεnƆ kàkɔa n pínɡi, aɔ kè gɔɔn bɔɔ swεεplaa.

16 Aɔ fεε wéten ɔfántɛo di mìdangura, gurɔ kè í e Benadada kɔn a kína daa pìnƆ dεε n bisakutaanƆ guu.

17 Ben gu gbēnsinƆ òwazi zìkari pìnƆ bɔε káaku. Ben Benadada zìrinƆ gàa wà òne, gbēnɔɔ e bɔɔ Samaria.

18 Ben Benadada bè: Tó aafian aɔɔe mɔɔn yoo ke kɔn zìo, à n kùkù bēε.

19 Kè gu gbēnsinƆ òwazi pìnƆ bɔ wéte guu, zìkpεεnƆ tɛ n kpεε,

20 ben aɔ baade a ibεε dè. Kè SirianƆ lèkɔa, ben IsarailinƆ pèrɔmma, ben Siria kí Benadada kɔn a sɔde kenƆ bàà sɔ wà n kè sɔ musu.

21 Ben IsarailinƆ kína bɔ à gàa à sɔdeenƆ kɔn sɔgorodeenƆ dèdε à SirianƆ ásarú kè maamaa.

22 Annabi pì èara à mò à IsarailinƆ kína lè à bè: N n zìkpεεnƆ kaara ògɔ kú kɔn soruo, zaake tó Sètántɛ kà, SirianƆ kína é èara à mó léemma dɔ.

23 Ben SirianƆ kína ìbanƆ bène: Isaraili tãanƆ né sɔsɔ tãanƆmε. Beee yãnzin aɔ gbãaa dεwalazi. Tó wée zì kaanyo gusararaan, wa gbãaa égɔ dɛnla.



24 Ñ n kína daanƆ lendee kpá, né dɔn'aede pãndenƆ diediε n gbèn.

25 Séde n zìkpεenƆ kɔn n sɔnƆ kɔn n sɔgoronƆ gɔ pari lán káakupƆ kè n korazinƆ bà, wé zì kányo gusararaan, wa gbāaa égɔ deńla. Kína n yā mà, ben à kè le.

26 Kè Sètãntē kà, Benadada SirianƆ kàkɔa, ben à gàa zì ká kɔn IsarailinƆ zaa Afeki.

27 Wà IsarailinƆ kàkɔa wà kūsãε kèńne, ben aɔ gàañzi. SirianƆ dàgula baama píngi, ben IsarailinƆ bùra kàε lán blè kpàsa néngo setεεε leɔ plaaanƆ bà, wà aε dɔkɔa.

28 Ben Luda gbē pì mò à bè IsarailinƆ kínanε: Dii bè, zaake SirianƆ e daa sɔsɔnƆ diin a ũ, guzure diin a ũro, é à zìkari parii kèkiinƆ nannε n ɔzĩ, négɔ dɔ kè ámbε Dii ũ.

29 Aɔ bùranƆ aε dɔdɔkɔa le ai gurƆ swεεplaa, à gurƆ swεεplaadee pìn aɔ nà zìla. Ben IsarailinƆ Siria kèsedeennƆ dède gɔɔn bɔrƆ basɔro zĩ pà.

30 Kè gbē kpaaanƆ lèkɔa wà sì Afeki wétεn, ben à bĩ lèε à sɔmma. Gbē pìnƆ kà gɔɔn bɔrƆ baaasɔro awεεswεεplaa. Benadada sɔ bàa sì à sì wéte pìn se, à gàa à ùte kpétu.

31 Ben à ìbanƆ bène: Wá mà IsarailinƆ kínanƆ gbēkεε vĩ. Wà pɔsia utanƆ dɔ wa pii, wà bà dɔ wa waale, wà bɔ wà gá wà à le. Wègɔ dɔro ke eé n tó wèndio.

32 Ben aɔ pɔsia utanƆ dɔ n pìi, aɔ bà dɔ n waale, aɔ gàa wà IsarailinƆ kína lè wà bè: N zòbleri Benadada bè n a tó wèndio. Ben IsarailinƆ kína bè: Ase à kpé kuuɔ? Ma gbēme.

33 Yā pì kè gbē pìnɔne àisi maaa ũ, ben aɔ yā pì dà

wà kù wà bè: Ee, Benadada né n gbẽme. Ben kína bè: À gá à à sé à suo. Kè Benadada sù, ben Ahabu bène à gẽao a s̄goron.

<sup>34</sup> Ben Benadada bène: Wéte kè ma de sì n deano mé ɛara mà sokpanne, négõ laa yaa Damasiku lán ma dee kè nà Samaria. Ben Ahabu bè: Wà ledole ke beee musu, mé n gbare. Ben à ledole kèo à à gbàre.

### *Annabi yādana kí Ahabula*

<sup>35</sup> Dii bè annabi gáli gbẽkenɛ à o a gbẽdaaanɛ à a lé. Kè annabi pì òne, ben à gí.

<sup>36</sup> Ben à bène: Zaake née Dii yā maro, tó wa kèkõa gõ, músu é n demɛ. Kè aõ kèkõa, ben músu à è à dè.

<sup>37</sup> Annabi pì gbẽke è dɔ, ben à bène à a lé. Ben à à lè à kèna.

<sup>38</sup> Ben annabi pì bisa kù a wéela à a zĩnda liɛ, ben à gaa èe kína dāa zé léa.

<sup>39</sup> Kè kína e gẽteɛ, ben annabi pì lé zùzi à bè: Mamoma n zòbleri, kè ma gaa zĩlan, ben gbẽke mò ma kiia kõn gõgbẽ keo, à bè màgõ à dākpa. Tó má tò à pìtimagu, ma wèndi musu, kesõ mà fĩa bo kõn kondogio kiloo baplaa s̄orosai.

<sup>40</sup> Kè ma làakari tà gu pāndea, ben gõgbẽ pì gè zéla. Ben Isarailinɔ kína bène: Lán weé wéɛ tamma nán n̄ ò gwe.

<sup>41</sup> À bisa pì gò a wéela kpakpa, ben Isarailinɔ kína à d̄õ annabi ũ.

<sup>42</sup> Ben annabi pì bène: Dii bè, zaake n gõgbẽ kè á diɛ à gaa gbàre, né ga à gèɛ ũ, n gbẽno é gaga à gbẽno gèɛ ũ.

<sup>43</sup> Ben Isarailinɔ kína dà zén à tà a be zaa Samaria. À nòse yàka à uu sìsi.

# 21

## *Naboti geepi líkpe*

<sup>1</sup> Beee gbera Yezerili gbēkee kuu, à tón Naboti. À geepi líkpe vī gwe Samaria kí Ahabu bee sae.

<sup>2</sup> Ben Ahabu bène: Ñ n geepi líkpe kpáma mà ke dò kara ũ, zaake à kú ma bee sae. Mé geepi líkpe kè à maa de beeela kpámma à gēe ũ. Tó ñ yezi, mé fīa bonne kōn kondogio lán à kũ nà.

<sup>3</sup> Ben Naboti bè Ahabun: Kai, eé sí kero! Mé fō mà túbi kè ma dezinō tòmee kpámmaro.

<sup>4</sup> Ben Ahabu nòse yàka, à tà be kōn pōsiaao kè Yezerili gbē Naboti bène é túbi kè a dezinō tòare kpáaro yānzi. Ben à dàe a gádoa à ae dò gūa à gī pó blezi.

<sup>5</sup> À naō Yezebeli m̀ à à là à bè: Bó bé à n le n uu sìsi, née pó bleroo?

<sup>6</sup> Ben à wèala à bè: Ma bè Yezerili gbē Nabotine à a geepi líkpe kpáma, mé fīa bone kōn kondogio. Tó geepi líkpe pānden à yezi sō, mé kpáa à gēe ũ. Ben à bè é kpámaro.

<sup>7</sup> Ben à naō Yezebeli bène: N Isarailino kí ina yákenan yèó? Ñ fee ñ pó ble kōn ponnaao, mé Yezerili gbē Naboti geepi líkpe sínne.

<sup>8</sup> Ben à takadanō kèkè kōn Ahabu tóo à à tambari làa, à kpàsákpàsá gbēnsino kōn kine kè aō kú Naboti wéte guunone.

<sup>9</sup> Takada pino guu à bè: À léyigurōo die à à kpàakpa ke. À vèekii maaa kpá Nabotia gbēno té

<sup>10</sup> à gbē ginano wete gōon plaa à ñ káe à ae, le aō yā dia wà be à Luda kōn kínao tó zaaa sì. À à kũ à bōo wéte kpee, é à pápa gbèo à de.

11 Ben Naboti wéte gběnsino kɔn kinenɔ kè lán Yezebeli ò takada kè à kpàsánnenɔ guu nà.

12 Aɔ léyiguroɔ diɛ, ben aɔ vɛekii maaa kpà Nabotia gběno té.

13 Ben gbě gina gɔɔn plaaa pino mò wà vɛɛ à aɛ, aɔ yá dia gběno wáa wà bè à Luda kɔn kinao tɔ zaaa sì. Ben wà à kù wà bòo wéte kpɛɛ wà à pàpa gbèo wà dè.

14 Ben wà lékpāsā kè Yezebeline wà bè, wà Naboti pàpa gbèo wà dè.

15 Kè Yezebeli mà wà Naboti pàpa gbèo wà dè, ben à gàa à bè Ahabunɛ: N fɛɛ n gá Naboti geepi líkpe kè à gionnɛɛ pi sí n pɔ ũ, zaake à kuu dɔro à gà.

16 Kè Ahabu mà Naboti gà, ben à fɛɛ èe gaa lɛ à à geepi líkpe sí a pɔ ũ.

17 Ben Dii yá sù Tisibe gbě Iliaa à bè:

18 N fɛɛ n gá Samaria kí Ahabu le. À gàa Naboti geepi líkpe sí, à kú gwe.

19 N onɛ kè mamɔma Dii ma bè, à gbě dè à mò à túbi sín gweroo? Né onɛ dɔ kè guu kè gběenɔ Naboti aru sàsān, gwen aɔé àpi pɔ sàsān se.

20 Kè Ahabu Ilia è à bè: Ma ibɛɛ, ai tia néɛ ma tóroo? Ben Ilia bènɛ: Ee, mée n tóro, zaake n n zĩnda dà yá kè zaa Diine kenan.

21 Ben Dii bè é mɔnzi kpánzi é n boriino kaate, n gɔgbě ke é gɔ Isarailino bũsunlo, baa wɛɛnɛ kesɔ zò.

22 É ke n uanɛ lán à kè Nebati né Yeroboamu uanɛ nà, lán à kè Ahia né Baasa uanɛ nà, zaake n Isarailino dà durunkenan n à pɔɔ fɛnɛ.

23 Yezebeli sɔ, Dii bè gběenɔ é à só Yezɛrili bĩi saɛ.

24 Gbẽenɔ é n gbẽ kè aǎ́é gaga wéte guunɔ só, bãanɔ é n gbẽ kè aǎ́é gaga sènnɔ ble.

25 Gbẽkee kuu ziki kè à a zĩnda dà yã kè Dii yeziroo kenan lán Ahabu bàro, bensǎ à naǎ Yezɛbeli è té kán.

26 À yã kè wà tènɔ kè maamaa, à tè tãanɔzi lán Amɔrinɔ kè nà, kè Dii pèímma Isarailinɔne.

27 Kè Ahabu mà ɛ, ben à a uta gà à kè à pɔsia utanɔ dà ai à iò, ben à lé yì à gǔ té kǔn pɔsiaao.

28 Ben Dii yã sù Iliaa:

29 N̄ è dian Ahabu a zĩnda nàeme nàó? Zaake à a zĩnda nàeme, mé yã zaaa pì ke à beene à gurɔɔaro. À négǔgbèn mé yã zaaa pì ke à beene.

## 22

### *Mikaya annabikɛyã zaa ona Ahabunɛ*

1 À kà wè aagǔ kè Sirianɔ kǔn Isarailinɔ e zì ká kǔoro.

2 À wè aagǔdee pì guun Yudanɔ kí Yosafata gàa à Isarailinɔ kína lè.

3 Isarailinɔ kína bè a gbènɔne: Á dǔ kè Ramɔ Giliada né wa pǔme yãroo? Mǔde wée à sina Sirianɔ kínaa yã kero.

4 Ben à Yosafata là à bè: Né gámao zì ká kǔn Ramɔ Giliadadeenɔroo? Ben Yosafata wèàla à bè: Pó dǔnkǔn wa ú, ma gbènɔ né n gbènɔme. Ma sǔnɔ né n sǔnɔme.

5 Ben à èara à bène: N̄ Dii gbeka n̄ ma gĩa.

6 Ben Isarailinɔ kína annabinɔ kàkǔa lán gǔɔn wàa plaaa bà, ben à n̄ lá à bè: Mà gá zì ká kǔn Ramɔ Giliadadeenɔon yó, ke màton gáro? Ben aǎ́ wèàla wà bè: N̄ gá! Dii é n̄ nanne n ɔzĩ.

7 Ben Yosafata bè: Dii annabi kee kú kè wà à laroo?

8 Ben Isarailinŏ kína wèàla à bè: Gōgbē kee kuu dŏ, à tón Mikaya, Imlā néme. Eé fō à yā gbekawe Diia, mode má ye à yāziro, zaake è yā maaa e à omē zikiro, séde à zaaa. Ben Yosafata bè: Kí, ònton o lero!

9 Ben Isarailinŏ kína a ìbanŏ doke sìsi à bène: Ñ gá ò Imlā né Mikaya sísi à mó kpakpaa.

10 Isarailinŏ kí kōn Yudanŏ kí Yosafatao baade a kible'uta dana, aō vēena ñ kiblekitaa pōwēēgbēkii kè kú Samaria bīilea, ben annabi pinŏ e annabikēyā oo ñ aē ñ píngi.

11 Kenana né Zedekia mōsi pì lán koba bà à bè: Dii bè koba kēnŏn né Sirianŏ zōzōo ñ ñ dēdē ñ píngi.

12 Ben annabi pinŏ e yā dōnkō oo ñ píngi wēe bee: Ñ gá léē Ramŏ Giliadaa, né fuaro. Dii é ñ nánne n ŏzī.

13 Gbē kè gāa Mikaya sísi bène: N annabi daanŏ lé kè don yee! Yā nnaan aōe oo kīnanē. Ñ yā dōnkō pì o se ñ yā nnaa onē.

14 Ben Mikaya bè: Má sì kōn Dii kuunao, yā kè Dii òmēēn mé o kīnanē.

15 Kè à kà, ben kína à là à bè: Mikaya, wà gá zī ká kōn Ramŏ Giliadadeenŏon yó, ke wàton gáro? Ben à wèàla à bè: Ñ gá léēm̄ma! Né fuaro. Dii é ñ nánne n ŏzī.

16 Ben kína bène: Gēn ūgban mé n da ñ sí kōn Dii tōo kè yāpuraan né omēē?

17 Ben Mikaya bè: Ma Isarailinŏ è fāakōana sīsīnŏ gēēzi lán sāa kè aō dāri vīroonŏ bà. Ben Dii bème, gbē pinŏ dŏn'aedee vīro. Aō baade tá a be aafia.

18 Ben Isarailinŏ kína bè Yosafatanē: Néē ma gweroo? Mēē onne kè è yā nnaa e à omē zikiro, séde

à zaaa?

19 Ben Mikaya èara à bè: Ñ Dii yā ma! Ma Dii è v̄εena a kpatan, ludambe z̄ikpεεnƆ zεzε à sae n̄ p̄ngi ɔplazi k̄ɔn ɔzεzio.

20 Ben Dii bè: Dé bé eé ɔnd̄ɔ daεme Ahabuzi à gá léε RamƆ Giliadaa lé à ga gwee? Ben gb̄εke bè la, gb̄ε pānde bè la d̄ɔ.

21 Ben nini ke b̄ò à mò à zè Dii aε à bè: Mámbe mé gá ɔnd̄ɔ daεzi. Ben Dii à là à bè: Né ke diamε?

22 Ben à wèàla à bè: Mé gá mà ke nini εγεdee ũ mà yā sóso mà ká à annabinƆne n̄ lén. Ben Dii bè: Né ɔnd̄ɔ daεzi, né fuaro. Ñ gá ke lé.

23 Len Dii tò nini εγεdee p̄i yā sóso à kà n annabi kènƆne n̄ lén lé n̄ p̄ngi. M̄ɔnzin Dii kp̄anzi.

24 Ben Kenana né Zedekia gàa à Mikaya s̄an kè à bè: B̄ɔren Dii Nini gòmala à gàa à yā ònnεε?

25 Ben Mikaya wèàla à bè: Né d̄ɔ z̄i kè n b̄aa lè n gaa ute kp̄étu.

26 Ben IsarailinƆ k̄ina bè: À Mikaya k̄u à táo wéte kí AmƆ k̄ɔn ma né Yoasio kiia,

27 é ōnne ma bè wà à da kp̄ésiaan, wàḡɔ burēdi kp̄áa k̄ɔn ío fétefete ai mà gá suo aafia.

28 Ben Mikaya bè: Tó n gaa n su aafia, ɛ̄nd̄ε Dii e yā o ma ḡāz̄i. Ben Mikaya èara à bè: Asa a baade p̄ngi ma yā p̄i mà.

### *Ahabu gana zaa RamƆ Giliada*

29 IsarailinƆ kí k̄ɔn YudanƆ kí Yosafatao gàa RamƆ Giliada.

30 Ben IsarailinƆ k̄ina bè Yosafatanε: Mé ma z̄inda liε mà si z̄in. Mm̄ɔn s̄ɔ, ñḡɔ kú kè k̄ɔn n k̄ible'utao dana. Ben IsarailinƆ k̄ina a z̄inda liε à s̄i z̄in.

<sup>31</sup> Sirianŋ kína gĩake sŋ à ò a sŋgoro dŋn'aede gŋŋn baaakuri awεεplaaanŋε à bè: Àton ae pé gbēkea zĩnlo, baa déme, séde Isarailinŋ kína ado.

<sup>32</sup> Kè sŋgoro dŋn'aedee pìnŋ Yosafata è, aŋŋe daa Isarailinŋ kiname. Kè aŋ sŋ dàa, ben Yosafata wii lè.

<sup>33</sup> Kè aŋŋ è Isarailinŋ kinanlo, ben aŋ à tò gwe.

<sup>34</sup> Kè gbēke kà gbàre, ben à gàa à Isarailinŋ kína pà à gè à mò'uta pékŋrekii dagura. Ben à bè a sŋgorodeenε: Ñ sŋ lé lie wà bŋ zĩn, wà ma kēnname gwe.

<sup>35</sup> Zĩ pì gbāa kpà zĩ beee, ben wà kína pì kŋkŋna a sŋgoro guu, wà ae dŋ Sirianŋa. Guu kè wà à kēnnan pì e aru bŋ èe kwεεε sŋgoro guu. Zĩ pì uusen à gà.

<sup>36</sup> Kè ɔfántē e gēε, zĩkpεenŋ wiii kākŋn wà bè, baade tá a bŋsun ai a bε wéte.

<sup>37</sup> Len kína pì gà le, ben wà à gè sè wà sŋo Samaria wà v̄i.

<sup>38</sup> Wà à sŋgoro pìpi Samaria íkaekiia, guu kè kaaruanŋ è zú on, ben gbēenŋ mò wà à aru sāsā lán Dii gĩake à ò nà.

<sup>39</sup> Ahabu yā kpaaanŋ kú Isarailinŋ kinanŋ gĩayākenanŋ takadan, yā kè à kēnŋ pĩngi kŋn kpé kè à bŋ kŋn wesa swaao kŋn wéte kè à kèkε à kàenŋ.

<sup>40</sup> Kè Ahabu gà, ben à né Aazia v̄εε à gbèn.

### *Yudanŋ kí Yosafata*

<sup>41</sup> Isarailinŋ kí Ahabu kíblena wè siigŋdee guun Asa né Yosafata kè Yudanŋ kína ū.

<sup>42</sup> À wè baaakuri asŋŋrodee guun à kè kí ū, ben à kí blè Yerusalemu wè baaasŋŋro. À da tŋn Azuba, Sili néme.



43 À zè kǝn a de Asa yǎkenanƆ zé píngi guu, èe pǎnero, à yǎ kè Dii yezi kè. Baa kǝn beeeo èe tǎagbǎgbǎkii kè wà bònƆ gbororo. Wà kpé wè saa ooa wèe tuaetiti kpataa gwe.

44 Yosafata kǝn IsarailinƆ kínao kú kǝo aafia.

45 À yǎ kpaaanƆ kú YudanƆ kínanƆ gǎyǎkenanƆ takadan, à négǝgbǎkeyǎnƆ kǝn zǐ kè à kànƆ píngi.

46 Tǎagbǎgbǎki kaarua kpaaa kè aǝ gǝ à bùsun zaa a de Asa gurƆanƆ, à pèmma gǝgbǎnƆ kǝn nǝgbǎnƆ n píngi.

47 EdmunƆ bùsu kína vǐ gurƆ beeearo, séde gbǎnsi kè YudanƆ kí diε.

48 À goro'ite latabnƆ kè lε aǝ gǎ vura sé Ofi, mǝde aǝe e wà bƆ táo ísiaalaro, zaake goro pìnƆ wíwi zaa EziƝ Geba.

49 GurƆ beeean Ahabu né Aazia bè Yosafatanε à tó a gbǎnƆ da ísiaala kǝn à gbǎnƆ lèdo, mǝde Yosafata e wero.

50 Kè Yosafata gǎ, wà à mira kpàkǝzi kǝn a dezin pǝo a dezi Dauda wétε, ben à né Yoramu vèε à gbèn.

### *IsarailinƆ kí Aazia*

51 YudanƆ kí Yosafata kíblena wè gǝro awεεplaadee guun Ahabu né Aazia kè IsarailinƆ kína ũ Samaria, à kí blè wè plaa.

52 À yǎ kè Dii yeziroo kè kè à zè kǝn a de kǝn a dao yǎo kǝn dƆ Nebati né Yeroboamu kè IsarailinƆ dà durunkenan yǎo.

53 À dƆ Baalizi à à gbǎgbǎ, ben à Dii IsarailinƆ Luda pƆƆ fǎnε lán à dee kè nà.

**Luda yá takada kǝn Bokobaru yáó**  
**The New Testament and portions of the Old Testament**  
**in the Bokobaru language of Nigeria**

copyright © 2005 SIM International

Language: Bokobaru

Translation by: SIM

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-09-22

---

PDF generated using Haiola and XeLaTeX on 18 Apr 2025 from source files dated 31 Aug 2023

c31548a1-5316-53c2-be42-674e0e4c5ae5